



特別  
14  
3152  
80



14  
3152  
80

訂  
正  
用





廬	禔
詩	碧
釧	鈞

大正丙寅三月

敬高内孝卿



日本自明治維新以後學術遂一大變。近數十年來。日本人士之游中土者。吾未嘗不得見也。觀其人。覘其風采。而聽其言論。大都皆彬彬文學之徒。最後得久保先生。東國詩人之尤傑出者也。日本詩學。導源於大津皇子。淡海三船之懷風藻。小野岑守之凌雲集。國人奉之爲風雅之宗。阿部仲麻呂。留學長安。與李太白王摩詰諸人游。浸淫漸濡。神明律呂。風騷之盛。於斯爲最。鎌倉以降。迭經喪亂。人亡道微。詩學之傳。其不絕者。蓋如縷焉。陵夷數百年。至德川氏興。投戈講藝。一時文人學士。繼踵而起。徂徠南海白石蛻巖玉山茶山詩佛山陽淡

窓星巖諸君聯轡齊鑣。後先輝映。明治中興。副島蒼海  
挺出。森槐南國分青崖等。各樹一幟。流聲於時。久保先  
生繼諸公之後。而躬值邪說橫行。斯文絕續之交。思以  
一身維聖學。正人心。凡柴乎其胸。而接構於耳目者。罔  
不發爲詩歌。形諸詠歎。以寄其箴時諷世之思。蓋非苟  
爲已也。客秋先生來燕京。招飲於舊社稷壇之水榭。以  
所著秋碧吟廬詩鈔甲乙兩籤見示。詞清而體潤。格高  
而致遠。一守唐賢矩矱。而間出入於明七子之間。吾不  
知其於蒼海諸子何如。然讀其古今諸體。巧心妍手。誠  
所謂衆品之獨秀。前超後絕者矣。吾國自變法以來。聖

王之詩教掃地殆盡。滔滔天下。至求一輞川栗里之區。  
而不可得。以視先生之抱膝長吟。嘯歌自適者。真不啻  
天上人間之別矣。先生頃復編訂其丙籤。問序於余。余  
與先生有一面之雅。故不辭。而樂爲之序。時丙寅三月  
十日也。先生日本信州人。平生慕甫里陸天隨之爲人。  
故自號天隨云。新城王樹枏撰。

余嘗於風清月白之時。在明窓淨几之畔。掩卷危坐。睪然遐想。以爲天壤間物。變嬗因時。彈指須臾。遽失其故。豐功偉烈。轉眼雲煙。鉅典鴻文。旋踵灰燼。獨至吟詠謳歌之事。苟能發之乎性情之真。託之於文字之美。則雖斷章殘簡。片詞隻語。往往沁浹心脾。淬礪金石。更歷千禩。無或磨磷。此何也。則以其爲之者。不緣於利害得失之私。其愛之者。絕無勢利阿附之見。順乎天行。契於人情。其始也。莫拔而起之。其既也。亦遂莫擠而止之矣。中國文學中之詩歌各體。其發源之古。歷年之久。爲技之精。行文之美。立格之嚴。至於今日之所造。憂憂乎。可謂

難矣。是以一般狂躁之徒。覺其藝之不可一蹴而幾也。乃反羞成恚。生心摧毀。以別求其所謂自由新詩者。不意毀之者。竭其萬牛曳樹之力。肆意狂詆。而爲之者。仍率其中流容與之常。流連忘死。乃至東鄰日本。語異詞文。異讀其爲之之難。十倍於中國人者。迄今猶多漢詩人。且竟有斐然成章。如久保天隨之漢詩人。噫。亦可以休矣。天隨之詩。余於甲子春。始得披誦。當時固已不勝驚服。蓋玩其音調。固已合聲而爲籟。其詞采。又旣練帛以成繒。知其於詩之爲技。固已可稱大成矣。不知今之摧毀漢詩者。亦曾夢到合聲爲籟。練帛成繒之爲如何。

境域。而知所慚惡否耶。今之輕作漢詩者。亦能心省合聲爲籟。練帛成繒之爲如何。境域。而知所奮勵否耶。至於天隨之詩。或者欲以源流派別之說。求之於古。究何所契合。則以余素主惟大成者。應百體俱工。不可以方隅限止之說。故不談。併願以此意。質之天隨。冀共勉焉。今當丙籤之成。知其境所造。必又有進於前也。故不辭。淺陋。樂爲之序云。丙寅上巳。橐吾楊成能撰。







到來雲曲韻于流水琴。有心哉擊磬。坐客共披襟。

太田建菴子爵資業舉曩祖道灌公贈位祭併徵

其詩乃賦此。

萬松臨海橫翠雲。芙蓉當檐雪色分。如此絕勝入詞好。  
乃得至尊含笑聞。八道兵戈歲月古。群雄各作負嵎虎。  
文章有神霸有才。魚水相逢誰是主。蛾眉謠詠奈離憂。  
梁柱摧乎吾事休。懸眼東門恨何極。長城無復檀江州。  
瑠璃宮闕勝疇昔。豐鎬頻開新巷陌。昭代追褒非偶然。  
微公河山沒幽僻。湘中曾掃墓門煙。手撫苔碑薦寒泉。  
絕叫英靈今安在。喬木斜陽四百年。

自笑軒輿田中暢園伊東聿水飲分韻率賦併送

暢園西歸

酒波漾漾漲瓊卮。四壁峭寒燈上時。瓶裏梅花影低亞。  
銷魂一朵韻於詩。

細嚼梅花笑引卮。清狂寧減少年時。儘將興會比崔顥。  
誰續個儂題壁詩。

解歌金縷勸金卮。行樂浮生須及時。頽玉尊前宵欲半。  
有人捧硯乞新詩。

算到歸程忽擲卮。重來合是牡丹時。勸君洛下成長住。  
不遣離愁入我詩。

有賀春波盈重見訪賦贈。

橫斜一幅巧傳神。疇昔孤山遠訪春。托月烘雲墨三昧。花光和尚是前身。

香妃曲

香妃以遠夷一巾幘誓死守節獨懷亡國之恨欲行豫讓荆軻之事於乾隆極盛之世雖志不遂其烈尤可稱異予曩作清宮詞爲之特著一首頃讀王闓運李孟符所記更詳其終始乃賦此云。

青天蕩蕩玉關西。慘目傷心今古齊。木壘河乾霜氣肅。烏蘭道遠雁行低。瀚海流沙作災劇。舊邦卅六淪無跡。

使香妃  
有室定  
步倚首  
秋謝

輪臺雲物闕晨昏。疏勒泉源賸郵驛。金微山盡起祁連。林麓南開草欲煙。半邊落日牛羊下。幾處回城笳角傳。氈裘肉食俗尤鄙。射獵胡奴帶弧矢。有美一人含睇看。燕支絕色總風靡。傾鬟素面謝凝妝。花讓嬋娟玉讓光。姑射神仙肌是雪。昭陽女弟體原香。絳紗繫臂情同舊。當日宮闈稱領袖。花蘂頻蒙蜀主憐。寶兒獨擅隋家富。黃金爲屋玉爲扉。簾幙一重燈九微。翡翠衾溫春意重。流蘇帳掩漏聲稀。無端浩劫乾坤改。安得繁華鎮長在。六師深入鼓鞶催。螳斧誤貽終古悔。黑水營前紅血流。三更刁斗警清秋。專車載得防風骨。鐵馬還從葱嶺頭。

天驕浪負威名著。只少河山宜割據。貔貅萬帳儼成屯。  
下殿青衣何處去。弱質空傷玉帳俘。此時薄命一身孤。  
弓刀結隊擁先後。扶上雕鞍便就途。磧裏髑髏羣鬼泣。  
故宮目斷獨嗚咽。絕域風雲奏凱高。千乘車騎期程急。  
露宿宵宵旅夢驚。內官奉旨遠相迎。行過邯鄲油壁穩。  
紅塵夾路入燕京。燕京三月煙花暖。雙闕晴開佳氣滿。  
太平天子愛風流。遲日亭臺弄絃管。西內春殘綠始繁。  
深深別院送黃昏。怪底顰眉單坐久。羅襟猶澆舊啼痕。  
零丁却覺加妍妙。梳洗偏羞鏡相照。例是息媯終不言。  
非如褒姒殊嫌笑。磐石有時還轉移。填膺此恨有誰知。

閉居莫比陵園妾。申志常思紀叔姬。回頭破國事難述。  
欲報深仇虛度日。輸著帷中聶隱娘。龍文匕首掣無術。  
徒爾徬徨煩聖衷。要看雞犬識新豐。滿苑肆塵人雜遝。  
參天樓觀玉玲瓏。推枕空牀秋夜永。薄幃半揭霜華冷。  
複道曾勞鶴籞趨。掖門豈許羊車幸。歲月欺人容易過。  
離鸞別鳳竟如何。新恩雖重義難忘。餘喘猶存痛亦多。  
既經堯母心頻顫。家法教兒每訶譴。聞道園丘駐蹕遲。  
慈寧宮裏召相見。墜樓一死有餘甘。畢竟贅旒生自慙。  
落花戀樹果何益。綠溼紅沈慘不堪。寂寂幽房鎖疏牖。  
一條雪練縈螭首。玉奴決意太從容。免與東昏輒孤負。

蘇軾陰風四壁寒。似聞梁上鬼聲酸。龍駕俄迴戶初啓。  
花鈿委地奈摧殘。殯宮守夜月如燭。明日空山又埋玉。  
可無簫鼓送西施。薤露唱殘歌一曲。千載恩讐跡已陳。  
汗青留得艷名新。水潔霜清翻自失。蕙心蘭質本殊倫。  
自古容華易銷歇。流光瞥眼更飄忽。紫玉唯餘塚上煙。  
綠珠亦作土中骨。浮生短夢驀然醒。漠漠苔埋恨血腥。  
一縷香魂呼可返。化爲蝴蝶瘦伶俜。麥飯冬青誰掃墓。  
依依春色等閒度。紅棠雨冷長藤蕪。腸斷陶然亭下路。  
將游月瀨有作

絕憐上國好風光。多事賺吾年聚糧。昨抵芳山今月瀨。

鞋花笠雪客行忙。

島原訪佐藤小石。彬遂留宿。

幽居饒野趣。偶坐慰羈心。墟落午猶寂。煙嵐晴更深。盈  
樽有醇酒。終日足清吟。咫尺梅花國。明朝聯屐尋。

月瀨十首

繁花催放白氤氳。宛轉黃鸝隔竹聞。何影迷離襯晴日。  
被寒盪漾帶微雲。數株橫地龍身似。一徑臨谿燕尾分。  
料識山前春正煥。好風吹過有餘薰。

萬峰圍繞一仙源。得得拖筇吟袂翻。斜岸板橋新漲水。  
疏籬茅屋晚梅村。烘花午日描微暈。吹面東風作驟暄。

此景平生唯想像。竭來縱目欲忘言。  
萬梅宛作玉參差。著意細看塵外姿。如許詩愁清不耐。  
到頭花韻瘦逾奇。一村晴靄藏鶯語。隔塢孤亭颭酒旗。  
隨處峰巒春點綴。香雲礙路步遲遲。  
一片煙痕畫不成。絕憐疏處影斜橫。便憑風日發丰彩。  
曾耐冰霜全性情。流水谿橋暗香度。斷鐘嶺寺薄陰生。  
恍然身化羅浮蝶。高下穿花自在行。  
谷口日殘禽語闌。淒迷煙景別成寰。寒生竹氣苔香外。  
路盡崩雲亂石間。豈有爭妍翻赴俗。只須抗節不離山。  
道人赤脚誦秋水。飽嚼梅花猶未還。

梅邊佇立客披襟。回首西山夕照沈。絕艷難摹猶覓句。  
孤清無匹儘同心。野橋薄暝帘痕澹。澗戶峭寒花氣陰。  
好待夜闌明月出。橫斜影裏又來尋。  
檐角斜枝絕可人。端於幽處極清真。何關霜氣凝當夜。  
祇道花香盪作春。獨立賸看仙骨相。三更添得月精神。  
峭寒如水酒消盡。驀地詩情聊一新。  
遍地橫斜花影重。靜看明月上前峰。併將磅礴谿山氣。  
繪出玲瓏冰雪容。如此夜深須罷笛。忽因風度又聞鐘。  
歸來一醉睡初穩。夢與瑤臺仙子逢。  
何來翠羽一啣啾。獨對梅花遣古愁。絕不關風香乍透。

看當欲曙影偏幽。檐前山近月斜流。峽口天傾雲亂流。  
挹取詩思如沆瀣。清晨晞髮倚高樓。

醉墨淋漓興正闌。與花爲別奈心酸。谿廻古寺雲堪臥。  
日暖空山玉可餐。好景他年愁落莫。勝游疇昔喜盤桓。  
歸歟又踐來時路。幾處停筇細細看。

前詩意有未盡。乃續成十絕句。

標格從頭不可羣。瑩於白玉潤於雲。每愁零落隨全盛。  
絕愛開花到七分。  
林麓煙開作嫩晴。香風一陣拂衣輕。引人直到花深處。  
百轉流鶯不惜聲。

一塢雲低午暈濃。株株錯落玉千重。醉餘猶怕踏花影。  
三尺相離閒倚筇。

步自山巔到水邊。風恬日暖弄春妍。槎枒橫路花初放。  
彷彿蒼龍抱玉眠。

谿山似倩大癡哥。探勝人從畫裏過。只有香雲宜渲染。  
不愁花少不嫌多。

澹日嫩雲花態新。百香野徑寂無人。翛然一種孤寒相。  
似與農家恰寫真。

嗅香未飽拗枝看。暝色四生鶯語殘。一片詩愁清到骨。  
與花消受晚來寒。

峭風吹亂鬢絲絲。日暮天寒酒醒時。憐汝谿頭慣孤寂。  
一株臨水影低垂。

曲曲山蹊短短牆。卓然得氣立昏黃。從來畫者徒辛苦。  
唯寫橫斜不寫香。

花香如水浸蒼苔。解得餘醒詩思催。玉地水天疑雪夜。  
夜深且與月徘徊。

蓑蟲菴題壁

排彼俗體。肇此雅調。心胸皎然。靈光遍照。于山于水。以  
延以眺。天機所泊。乃該衆妙。桑梓不遠。於焉歌嘯。我思  
古人。束芻來弔。白雲在天。其德何邵。梅花滿枝。其神酷

肖。

鍵屋達卽寬永中渡邊數馬復仇處

兄弟之讎不反兵。可憐一枝摧紫荊。忍聞君侯憤餘逝。  
狂豎罪惡正貫盈。賴有姊夫重大義。一朝辭仕心無貳。  
相攜物色頻苦辛。誓斷賊頭初快意。伊賀城邊候曉噉。  
板橋霜白印鞋痕。仇人來矣揮刀起。殺聲急捲沙塵昏。  
自辰及未酣鬪久。道傍過者皆却走。若無英雄殲群兇。  
或恐勢孤志空負。故驛蕭條歲月過。豐碑新峙山之阿。  
遺聞猶教懦夫立。一門勇烈感人多。我來恰值仲春節。  
野店沽酒肝肺熱。紅梅花落地上鋪。錯認當年淋漓血。



觀菩提寺

歷劫招提古。繁華憶往年。尋幽早梅外。拾句晚晴前。萬法歸一寂。吾生休問天。上方孤磬斷。竹氣暝於煙。

棘蠶瀨

兩山欲披靡。一水流滄滄。亂石競騰昂。衝波逆折急。峽天捲濃霧。飛沫玉爲粒。橫風拉之吹。濺我衣襟溼。其下潭影圓。萬派齊相及。黛蓄不知深。疑有老龍蟄。隔岸彩翠重。疏處斜照入。林陰雜薄嵐。暮禽此翔集。賞心暝忘歸。清氣恣噓吸。灘響聽更高。翛然倚筇立。

心中巖

巖在島原橋下流數百步。相傳驛之舊家子某喪怙恃。寄食叔父。與其女通。情好日密。未幾女爲父母所逼。嫁上野富商。某悲傷不勝。獨立水邊。望女過橋。不覺狂呼。走欲就之。遂溺于巖下。後數日。女屍亦浮其處。闔里始知二人有私云。或謂心中當作眞珠。邦音相近。故訛耳。奔流衝巖。飛沫萬顆。日光射之。燦如眞珠。此所以有其名也。未知孰是。

心中邪。眞珠邪。揚波而躍者。天吳邪。東門之栗。有踐家室。與爾偕老。誓不移。看爾負心。吾事畢。慘過哀哀尾家子。抱巖瞻望。泣寒水。黃金作車。玉作輪。前有妝奩。後侍

稗我死固難止。只任飢蛟來啖屍。爾死亦非晚。罡風一  
夕花辭枝。可知珠是鮫人淚。安得串之託所思。廬江小  
吏今怨誰。心中之苦無軒輊。

笠置逢雨

峽口斜照微。亂雲蔽天起。驀然雨陣過。龍氣簸江水。笠  
峰眉睫間。萬巖高下峙。走翠晚更迷。吹入濛濛裏。緬想  
城陷時。斃慘亦如此。鬼雄聚成羣。餘怒猶未止。谿亭卸  
旅裝。一浴快無比。呼酒又倚欄。舒嘯初莞爾。天霽數星  
明。夜山長邈迤。洪流靜不聲。燈火落沙嘴。

六甲山苦樂園訪福田眉仙

指點興亡跡。憑高望眼開。晴煙五州盡。斜照一帆來。形  
勝看天意。干戈憶霸才。羈愁易棖觸。旋被暮鐘催。  
頌得閒中味。素心賓主兼。松聲生別澗。花氣隔疏簾。夜  
靜寒偏怯。談清酒幾添。揮毫還一笑。醉墨染吳縑。  
潑眼新晴好。欄前望不迷。潮光無遠近。山色自高低。嫩  
日排花上。幽禽出樹啼。晨興詩思淨。聯襪又扶藜。

岡本看梅同眉仙

青鞋布屨試閒游。每向野梅多處留。消受清寒吟思永。  
此生只慣替花愁。

遙看林外酒帘颺。茅舍竹籬春晝長。五出花輕飄點額。

村娃又作壽陽妝。

玉蘂珠葩瞥眼非。低徊無奈賞心違。東風作惡頻飄落。  
憶到前宵一笛飛。

幽閒一味澹相看。看到凋殘愁更酸。剗地微風花似霰。  
谿山日午尙春寒。

昨夢依稀記不真。此來且擬弄煙春。可憐抵死賸情思。  
片片飛花頻趁人。

林下拖筇步自遲。如今惆悵負佳期。只緣晚出色香異。  
絕愛湘梅花一枝。

高下林巒一徑通。幽雲澹日午微風。旗亭沽醉聽鶯語。

酒氣噴梅花亦紅。

依然獨秀在空山。霞氣紅勻春正閒。沒却冰霜真況味。  
如何盡日作酡顏。

石上題詩興不孤。他時或恐跡模糊。只須倩得花光筆。  
補作梅邊聯榻圖。

繞著林亭去復回。殘香漠漠掩蒼苔。料知明日春初鬧。  
谿杏山桃得意開。

游大宮公園同伊東聿水岡野楓林。

阿誰水調唱歌頭。四面風簾自上鉤。花氣醺人濃似酒。  
么櫻紅擁一亭幽。

送日下勺水游紀州

峭壁攢峰青簇簇。熊羆所宅野形蹙。石棧忽斷鳥道斜。  
濃嵐四面行人獨。玉井口邊儼輕舟。岸高潭深水廻洑。  
奴視巫峽駕瞿塘。攝取谿巒氣靈淑。采芝已過徐福祠。  
去向那智觀巨瀑。天風吹作六月寒。白日萬雷震林麓。  
蜻洲地脈南盡頭。稜楯巖礙潮勢速。黑濤翻倒馮夷宮。  
可憐魚腹鬼夜哭。四十八嶺路高低。時遵海嶠縱心目。  
圓月潮漾洞龍吟。鉛山泉溫宜留宿。雨霽明光浦雲開。  
風暖仙娥廟花馥。依稀金碧高野巔。石磬曉催僧舍粥。  
鴻蹤算到廿年前。于今寤寐猶思服。蹇予久墮塵網中。

世事蹉跎徒碌碌。離筵宛見白雲飛。螺杯笑酌綠醅熟。  
爲君細說路所由。併詫邱壑胸底蓄。借問前賢游者誰。  
文有拙堂詩白谷。縱令聯鑣擅盛名。竊恐絕勝被塵瀆。  
範山模水羨君才。著筆每出新機軸。若或相之頻作篇。  
永州八記比深穆。我願三月又聚糧。杖屐再度窮川陸。  
迂行乃自芳山南。一綫樵徑趁麋鹿。詞壇耆宿幾人存。  
多是羊頭賣狗肉。苟能精思奪化工。江山可移地可縮。

觀梅蘭芳演天女散花劇

一自司隸賦戲場。菊部南北較短長。殊色昔有王紫稼。  
絕技今見梅蘭芳。聲價花旦推第一。蠻鞞窄袖結束出。

更扮天女矜端妍。認得上界冰玉質。琉璃碧瓦五色霞。  
瑞光蒸透七寶花。妝罷晨辭衆香國。花奴前導雲路賒。  
霓衣玉佩穩飛步。何來鸞聲如拍數。一瞬橫絕須彌巔。  
海山蒼蒼半煙霧。毘耶離城春已過。丈室猶臥病維摩。  
現身說法揮塵處。諸佛隨喜得禪那。曼陀雨下香四散。  
彷彿淨土風日暖。天女合掌又歸依。綠譜紅腔歌初斷。  
此曲莫漫供晏嬉。果然六塵可厭離。翻笑元宮天魔舞。  
併學西僧演渌兒。

寄題妙高山永台精舍

沙彌天子感奇夢。幾處梵宮巧補空。半山擎出七佛壇。

西土五臺相伯仲。忍見殿閣化爲烽。榮公募緣存舊蹤。  
精舍更構妙高頂。卽是安蘇第一峰。飛駒之水清且駛。  
聞昔此間產騾駟。獨松關古當上游。金碧爛帶斜陽紫。  
聖馨苑接常翠林。花塢烏啼春色深。養神臺下跏趺處。  
天女池澄夜月臨。磴道盤空足躡躡。儘有煙霞堪縱目。  
紅葉秋繡天狗巖。歸雲晚向峰頭宿。勝游他日躬經過。  
恍聽魚山清響多。且爲佛印施玉帶。我是再生老東坡。

那古耶行營甄屏歌爲內田遠湖

周平

古甄壞缺土花蝕。彷彿秋煙籠月色。色是蒼黝形是圓。  
桐章隱起猶可識。有客昨游那古耶。豐家故墟夕陽斜。

手拾而歸日把翫。鑄爲研屏向人誇。不似桃山黃金瓦。  
儉奢隨時看取舍。憶得此軋出窰初。西陲卜地築高厦。  
樓船蹴浪天吳驚。鼠竄誰敢敵神兵。奮迅三路電一掃。  
數旬之後會漢城。金尺山河忽破碎。連勝餘威震海岱。  
今日咸北虜二雛。疇昔平壤拔要塞。元知和議收局難。  
或恐彌久銳氣殘。怒裂册書擲冕服。快舉故激將士肝。  
重教孱王嘆瑣尾。早晚薊丘屠封豨。出師未捷臨死呼。  
隻騎莫爲異鄉鬼。回頭撥亂歲月長。胸宇浩浩吞八荒。  
窮兵黷武非公志。萬邦要仰天日光。先皇夙定綏遠策。  
雞林曩歸新版籍。九原有知喜如何。形勝終古留霸跡。

記曾傲舟發唐津。潮通玄菟碧粼粼。薄暮擊汰過墟下。  
浩歌酌酒感慨頻。未央銅雀今隔世。此物從來關興替。  
撫摩消盡劫燼痕。陵谷遷移三百載。潤緻堪欺金石堅。  
矧又神鬼呵護偏。寄託幸值儒中傑。清時長結翰墨緣。

寄題朝鮮木浦松島祠。祝史高橋花泉種之囑。

波灩灩。煙幽幽。八百青螺似松洲。崇祠憑高丹碧麗。華  
表倒影水上浮。形勝古意多。有時魚龍變。依稀記得文  
祿年。樓船諸將此鏖戰。竇融既獻土。漢道日以恢。檣域  
今霑新雨露。驚見埠頭萬貨堆。鼓鼙風肅肅。日神一  
臨六合明。檀君箕子皆倚伏。伏臘享祀乃介景福。

新夏雜詠次韻岡崎春石

花後綠成陰。風薰酒人室。枕琴恣午眠。夢追竹溪逸。焉可無此君。君亦有醉日。

桃李已結實。一歲不再陽。推移眼前疾。剩我雙鬢蒼。讀書藪至理。只愛清晝長。

躑躅倚池石。薔薇傍庭除。假山饒幽趣。楓花紅瀉初。不似春色縛。物物皆澹如。

柳煙籠遠汀。蘋葉浮清沼。風蝶冷然來。欲就釣絲裊。一竿足忘機。寧論魚大小。

彭殤已無異。功名等雲煙。萬理自森著。一悟能通禪。移

榻綠陰底。耽吟日爲年。

峨眉山歌送飯塚米雨游蜀

峨眉之山拔地一萬五千仞。儼爲西蜀之巨鎮。百二十  
里程程傾仄鳥道危。峰迴嶂轉尤險峻。唯須坐山橋。健  
卒魚貫繚而進。何年普賢茲留蹤。于今金碧莊嚴樓閣  
重。白鹿銜花時供佛。旛幢颭處自鳴鐘。千尋松檜遮天  
日。下有黑箐豹霧濃。飛泉瀑流劈峽谷。晝夜聒耳聲淙  
淙。古苔挂樹毳似髮。琪花瑤草矜殊容。攀盡七寶巖。笑  
踞黃金頂。眼前忽現兜羅綿。銀色世界一清迴。兩脚初  
收日暈生。五彩爛斑圓光炯。其心虛朗疑磨銅。驚見依

稀攝身影相竝。雲物淨盡一瞬中。剩得金橋與虹等。天  
風起兩腋。飄然欲高騫。指點岷江一道細。於綫岷嶺萬  
重又如拳。大小瓦屋外。雪山相繚聯。總是太初元氣所。  
盤屈繚青繞。白渺無邊。呼吸通帝座。振衣浩嘯仙乎仙。  
謫仙屢詠峨眉月。坡老曾稱峨眉雪。未聞去窮洞壑幽。  
致身福地探真訣。獨有石湖一詩翁。登高吟成秀且潔。  
詩畫雙絕憐君才。杖屐到此心胸開。朝吸沆瀣夕煮石。  
只須峰巔恣徘徊。詩以闢靈淑。畫以摹崔嵬。結得淨綠  
筆逾妙。絕叫前賢安在哉。蓬桑不負丈夫志。今宵餞行  
共盡醉。莫忘礪礪一塊袖中藏。持贈使吾識秀異。到日

錦城西望天無雲。峨眉雪白晴色分。歸時扁舟穩下平  
羌峽。峨眉月明又隨君。

鮫洲海樓雅集次勝島仙坡韻

長詠纓堪濯。漁歌水一涯。江湖杳在目。雲日澹宜詩。蜃  
氣隨風散。帆光趁暝移。獨醒人可弔。隔世感相知。

題菽野和菴由之禹域游草

玉璽北移瀛國孤。中原多故足長吁。例將口舌爭名器。  
幾自要荒割版圖。社稷既經刀斧劫。關河空鎖帝王都。  
何時整頓乾坤了。滿目滄桑淚亦枯。

紛紛蟻鬪與蝸爭。打劫頻看局面更。輸著張華知紫氣。



枉教王衍誤蒼生。衣冠變俗固非恥。寇盜臨邊殊可驚。  
擊筑悲歌人已去。登壇豎子總無名。  
看盡風雲變態多。斜陽落木舊山河。鄰交只合重然諾。  
新政無端稱共和。地棘天荆聊復爾。吳頭楚尾竟如何。  
擲杯漢上秋殘夕。長鋏思歸又浩歌。

團扇用陳碧城詩韻

冰絲一幅剪裁歇。鶴翎鸞羽比柔滑。澄光緻緻照人明。  
仍與妾心圓似月。且喜動搖涼意多。撲螢女伴笑聲和。  
街頭休障張郎面。閨裏偏憐桃葉歌。畢竟盛衰世所有。  
招風曾託纖纖手。一朝恩絕篋中捐。班姬當日低徊久。

上林花鳥常作春。咫尺昭陽夢不真。此物從來長愁思。  
何須故畫漢宮人。

開泉閣小集送沼波瓊音武夫游滿洲

起指天西極。問君何日還。萑苻滿三省。風雨暗千山。歷  
劫地猶利。感時心未閒。昭陵唯草木。游子淚潸潸。

雪蕉圖

粵若稽古王摩詰。丹青獨絕神仙筆。曾託高情畫袁安。  
雪中芭蕉神爽逸。後年老熟稱殊宜。清閨閣藏推第一。  
老鐵作歌聲價增。絹黃婦幼誰能匹。只緣寒暑物相并。  
枉遣後人費評隲。宋明之間論未終。欲辨此景虛與實。

或云嶺表冬亦暄。芭蕉自若葉猶密。夜來驟寒下雪時。  
眼見奇趣之橫溢。右丞未試江南游。焉得傳聞極詳悉。  
畢竟創意欺化工。至味乃自毫端出。以水爲熱火爲寒。  
禪家妙悟口難述。一旦造理接妙機。得心應手能事畢。  
法眼觀之却自然。俗目對之輒驚恍。桃杏芙蓉又交枝。  
慣用手段非粗率。維也雖可他人否。到底氣韻摹無術。  
縱令創意皴擦頻。玉爲楮葉翻自失。畫工如山漫競名。  
腐氣滿幅神已窒。似而非者指可彈。矧是虎皮兼羊質。  
詩家三昧將毋同。舉世區區攻聲律。唱到白髮三千丈。  
幾人果入青蓮室。

次林田炭翁題壁韻乃寄集宋人詞句。

魯望將成笠澤書。辛勤看汝替營居。鶯聲圓滑堪清耳。

一樹桃花映草廬。

范成大陸游  
丁謂陳與義

三原世外互華甲壽言集清人詩句。

廉讓之間穩結廬。胸中硯礪漸消除。楞嚴在左南華右。

六十年來見有餘。

厲鶚張問陶  
黃任毛奇齡

同仙坡鐵石小峴六石游秩父車中作。

卅里饒詩景。一車皆故儔。煙嵐衆山秀。桑柘古城幽。載  
酒尋佳約。離都足勝游。峽門知在近。紺碧水奔流。

石龍洞

秩嶺千萬重。谿壑森以邃。就中武甲西。巨洞蓄靈異。今  
我披荒榛。爽塏尋古寺。崖腹途方窮。巖戶雲自闕。秉燭  
互讓先。僂僂爲雁次。黝冥咫尺迷。躡梯戒顛躓。其下聯  
三房。各闢十笏地。虛朗同瑤宮。四壁光潤膩。石乳所凝  
成。一一形貌備。羅列紛在前。宛見化工戲。或立如佛像。  
或橫如法器。或如鸞鳳翔。或如蛟龍睡。陰風吹人面。奇  
寒似刀刺。疑墮奈落底。悚然心驚悸。拾級向上方。旁出  
窄於隧。深窾導陽光。相顧初安意。石經誰雕鐫。玉虛存  
制誌。載籍堪考據。定與茲洞類。招提游亦宜。攬勝遺塵  
事。且欲禮觀音。抽筆闡幽祕。

長澗

東山馬脫銜。西山鳳拊翼。林麓紛錯互。峽勢忽相逼。一  
水疑建瓴。滔滔奔向北。湫流此間聚。深湫龍氣黑。路盡  
河之浹。石壁當面仄。孤亭位置宜。臨眺且止息。巨靈所  
刻雕。巧構殊人力。懸溜自頂瀉。草樹難根植。微風涼意  
饒。漭漭涵晴色。彩翠帶夕麗。彌望雲絲織。濠濮想無窮。  
掬得清湜湜。嗟予居下流。慣看水如墨。物外偏夷猶。賞  
心惜日昃。九秋更若何。重游言不食。

寶登山祠

寶登山如繪。樹色青網緼。霽景浮陵隰。煙颺桑柘村。散

步趁清曉。微涼吟袂翻。疏籬槿花發。白露霑有痕。松蹊  
行欲盡。鼓聲聽不喧。丹碧餘傑構。崇祠繚畫垣。玉井泉  
膏沸。遺躅懷武尊。勳業輝青史。威靈終古存。謳歌慶豐  
稔。王化覃邊藩。祈賽豈無驗。拜跪羞芳蓀。

采葦

林巒過雨後。天澄晴靄碧。乃趁葦氣新。游陟著輕屐。松  
釵紛滿蹊。餘溼苔衣積。求之苦相勞。偶然有奇獲。采采  
已盈籃。異芬豈難跡。忽看午影移。樹下設茵席。團坐恣  
貪饒。其味欺玉液。可以遺細君。擔揭甘爲役。禽聲促我  
歸。斜照早楓赤。隔掩鐘一杵。徙倚日之夕。

寄伊東聿水

一雨洗空碧。倚軒吟興賒。涼風吹白苧。秋信遲黃花。老  
莫傷人事。詩須副物華。雲間士龍在。會面久相差。

吳通事行

天生吳鳳任。綏撫四十八年。洵辛苦。何以報天德。施未  
普。身代斯民。或有小補。通事自責重。以周不怪。雞距傀  
儡仰之等。生父阿里山。番尤儉。銅鼓奏樂人。爲牲康  
熙之末。四十唐官同日死。髑髏生牙紛滿棚。通事疇昔  
諭巨猾。每年一頭祀羅刹。用之而盡爲汝謀。其間相戒  
毋嗜殺。冬菊春荷。歲月移。鯤身鹿耳聲教熙。底事番社

序多子情  
一氣呵成  
掬水不漏  
吐霧吞雲

存陋俗。唯喜解禁。恰屆期。慇懃重諭。暫相緩。牛羊布帛。從汝所欲。而遺之。又閱三年。番逾怒。土目率衆。詰誦訴。百方慰撫。終不聽。畢竟豚魚。要無忤。明朝授汝。以一人。朱衣紅巾。看勿誤。嗟汝殘虐。心難回。積惡必遭。神明怒。長鉗勁箠。賊作羣。其時六合。雲閉白日曛。番衆大呼曰。獲矣。何圖馘之。傳觀是吳君。他時又被疫癘襲。天譴分明。悔靡及。荔丹蕉黃。進侯嘗。埋石而誓。齊掩泣。假令八掌谿。涸玉山崩。子孫百世。不復爭首級。卽今南荒。雨露均。鋤犁隨處。披荆榛。畫壁彩楹。廟貌壯。伏臘享祀。足千春。移風易俗。殺身成仁。貪夫廉兮。懦夫起。汗青終古。姓

名新。乾隆己丑秋八月死。享年七十。鳳字元暉。漳州人。

白鬚草

予往年登白山。就一老樵。獲異聞。今詩焉。以廣其傳。少年名美。可兒部。化爲石。曰神部巖。白鬚草多生于巖下云。

白山冰雪凝作肌。羽帔星冠穩相宜。天風浩浩飄靈綬。仙愁吹入笛一枝。綠衫年少誰家子。弭節而聽方移晷。目笑眉語雙手攜。若許同棲何辭死。洞門中開樓閣重。琪花瑤草春正濃。半宵夢暖珊瑚枕。遲日歌酣琥珀鍾。

稗官四庫詩錄 卷七  
忽驚列缺驅霹靂。風雨颯沓撼巖壁。倏然來者呼吾仇。  
悔偷人妻貽伊戚。泣懷圓銅促步歸。老魔追奔捷于飛。  
照破邪形免虎口。毒霧斂處靜朝暉。無端忘却別時戒。  
引鏡一瞥顏色壞。髮白面皺八十翁。始知人間日月邁。  
可憐七尺丈夫身。化作怪石青嶙峋。骨碎筋摧有餘痛。  
擺落幾莖鬚如銀。織英細藥花容潔。歲歲催秋露珠綴。  
白鬚草生白山巔。向來哀樂與誰說。

太田建菴招飲湖亭賦謝

水榭秋闌候。涼多怯酒消。盍簪值先輩。觴詠永今宵。天  
外雁聲警。湖心燈影搖。文章存夙志。擬答聖明朝。

題鬼趣圖次徐仲可珂韻

咫尺六天黑。到頭四大空。笑入芙蓉館。嘯倚毘藍風。生  
當爲人傑。死當爲鬼雄。  
滅却洪爐火。一椎破萬有。盤古骨已灰。女媧亦斂手。要  
返二氣初。鴻濛道乃久。  
莽莽人間世。怨氣輒作災。傀儡趨丹陛。髑髏舞高臺。蝦  
蟄夜食月。莫遣清光廻。  
雖云富潤屋。諸塵塞心竅。所以劉伯龍。不免鬼大笑。今  
我鼓缶歌。和汝梁上嘯。  
精靈不復形。煩冤誰似汝。可憐虺啖餘。幽魂隔煙語。今

日孤冢主。當年傾國女。  
青林黑塞下。幽怪宛見之。翠燭冷不燄。酸風雙目眇。別  
有心中鬼。君子戒多疑。

仙嶽雜詠九首。用友野霞舟題圖原韻。

維嶽神所宅。谿山毓其美。樹色霜露餘。泉聲澗谷裏。今  
我飛鳥游。翛然反太始。  
巖罅樹倒生。峰背雲斜抱。落葉黃撲衣。洞壑秋欲老。蒼  
崖可題名。徒倚寒山道。  
亂雲輕似絮。度壑頻去來。奔流疾於箭。觸巖幾觝限。翫  
景適曠衷。蹇步仍徘徊。

荆關布置工。橫卷取次展。路與谿縈紆。終隨崗勢轉。亂  
石大於屋。行見澗流淺。

嵐翠墮紛紛。木末風掀蕩。一峰兀當前。仰視不計丈。長  
嘯驚山靈。飽恣塵外賞。

覺圓何代人。高躅存洞戶。猿鶴棲穩處。松檜免樵斧。他  
年茲清修。御風到崑圃。

煙嵐隨筇撥。隔谿眄羣岑。風泉相鼓盪。虛籟和清音。黃  
蘿間紅葉。微徑窈窕尋。

飛瀑勢如擣。亂擲珠千斛。脚下迅雷轟。躡徑怕顛匄。濃  
霧闕巖陰。林寒飢禽哭。

谿壑攬勝盡。采芝南澗濱。妙機若有會。茲心返真淳。疏  
林雨晴處。斜陽送歸人。

題正木鶴山

照藏胡沙集

輜軒一過意從容。卅首新詩元氣鍾。早晚應看王化遍。  
白山黑水路千重。

鹽谿紀游

行過白雲洞。宵駕指前程。地上數人影。峰頭孤月明。陂  
陀頻轉路。風水驟成聲。到骨秋寒緊。沆寥霜氣清。  
薄夜人行少。峽間秋正深。征途畏霜露。勝境傍山林。一  
水拖煙澹。羣峰背月陰。廿年游跡舊。明日可重尋。

清景隨行步。終忘脚力勞。霜天擎月鏡。夜壑捲松濤。夾  
水千峰秀。凌虛一閣高。欣然此投宿。到手有香醪。

晨起且凭檻。清吟寒不妨。危峰嶄有壁。初日白欺霜。猿  
狖所棲息。林泉偏老蒼。微風拂遙靄。禽語報晴忙。

亭臺競高下。位置補天工。連岫曙雲白。滿谿秋樹紅。林  
巒引人入。杖屨與誰同。石躍泉聲大。淙淙聽不窮。

峽天生爽氣。嵐翠溼衣巾。崖險橋無脚。煙深樹隱身。谿  
山宜獨往。魚鳥儘相親。日出林篁靜。高秋發興新。

信步到幽處。林端啼鳥過。巖危通路仄。木落看天多。嵐  
影迷山麓。霜威肅澗阿。此中有真趣。佇立聽樵歌。



不怯羊腸路。吟行飄欲仙。雲中傳斧響。谷口颺炊煙。亂水過橋闕。晚楓承日妍。倚筇攬佳景。嘯傲息諸緣。泉源探勝盡。一徑幾盤迴。石氣暗含雨。屐痕明在苔。籟林風颯沓。隔澗葉飛來。咫尺雲生處。瀑聲轟似雷。意欲買山住。此間蠲世煩。漁樵好生計。洞壑小乾坤。當檻松皆古。滿槽泉自溫。遂初在何日。惆悵又回轅。

妙雲寺

山名甘露。瀑曰常樂。相傳寺係小松內府姨妙雲尼開創。寺後九層塔。卽其墓云。永祿中有殘夢道人者。募緣鑄鐘。其疏今藏于寺中。

帝閣

金界幻出兜率天。清秋絕頂慧日妍。九層塔殘苔痕古。花寒篆瘦七百年。甘露山圍招提境。妙姑託蹤茲習靜。晨夕常樂聽瀑聲。紫石牀上發深省。回首風雲變乾坤。一朝神器出宮門。傷哉厓山波漾血。闔家骨肉幾人存。如此末運看髣髴。疇昔內府心佛鬱。安禪有個優婆夷。傳得一軀釋迦佛。姪女久擅國母名。又披袈裟謝世榮。寂光院裏春尙在。杏艷桃嬌却無情。茅菴邀得法皇駕。感時懷舊煩慰藉。夢入龍宮更驚魂。歷盡浩劫談不罷。豈如洞天深避秦。笑將雲鶴日相親。榮瘁兩忘能延壽。香火便了清淨因。此生只要舍身早。覺後自通解脫道。

道人功德鐘亦靈。敲破殘夢消煩惱。

鹽釜里。讀高尾碑作。

箒川西開平如掌。湯井漲膩流蕩蕩。澤氣多。女果不誣。矧又妖花生糞壤。浣紗石古苧蘿涼。昭君臺圯谿水香。有情吾是胡爲者。一種淒寥枉斷腸。或云平康矜妍絕。錯教太守肝肺熱。三义江口木蘭舟。魚龍水冷漾媽血。或云遲暮拋塵緣。蒲團松火夜窓禪。頻伽聲裏紫雲下。蓮花鐵鉢淨娟娟。粉黛山河仍似舊。楓紅菊黃綺於繡。隴上殘碑手撫摩。人生豈比金石壽。翻憐老儒解風情。文章定是費經營。只惜摛辭太蕪雜。紀述又缺考覈精。

果上鐵鉢生石蓮

他年此出一孝子。姜鯉孟筍差可擬。願復其後旌閭門。千秋且期政化美。輕重相形誠易知。世人好色徒爾爲。何怪譚銖竊一笑。真娘墓下例題詩。

回顧瀑

奔泉從北瀉。深壑轟霹靂。昨日橋上過。俯瞰雲如霧。石徑欹而斜。臨危還懷戚。茲就瀑底看。當面聳絕壁。銀絲亂颺空。疾風橫相擊。彌望煙濛濛。餘流更噴激。飄然欲遐舉。此心愜孤寂。衣帽溼生寒。樹梢擺殘滴。停筇且夷猶。勝境快探歷。佳名洵不虛。回顧復長覲。

那須野

浮雲直北接三陸。亂水正南趨兩毛。何草不黃風浩浩。  
平原落日馬嘶高。

福井學圃小祥忌賦奠。

淨界鐘聲度。凝佇墓門側。闕伽供菊花。一枝憐佳色。林  
下黃葉翻。塔背斜陽仄。霜露百草枯。殘蛩聲啾唧。魂兮  
不可招。騎鶴游八極。彷彿接音容。夢醒復相憶。佳篇吾  
能記。語語真傑特。夙嫌時尙卑。漢魏爲楷式。繼起今有  
誰。藝苑增悽惻。伯牙已絕絃。長音仰淚霑臆。

猗猗山房詩爲太田建菴。

居不可無竹。無竹令人俗。坡老語自雋。誰能繼逸躅。露

壓煙啼晨。檀欒看簇綠。清風明月宵。鏗鏘疑憂玉。公是  
名門裔。富貴而知足。文雅類曩祖。聲色絕嗜慾。時有新  
詩成。憑軒朗吟續。蕭騷響相和。如奏淥水曲。豈啻矜高  
興。君子以自勗。乃秉正直心。終身無憂辱。

平語樂府十闕

祇王怨

佛原爲凡夫。凡夫亦成佛。但因君心好惡洵無常。一朝  
失寵同棄物。母子熒熒分淨綠。洗盡鉛華志逾堅。寶釵  
珠袖賤如土。燈火孤龕共安禪。君不見冰山忽崩魂欲  
斷。四海兵戈奈喪亂。秋風出洛幸不遲。可憐女中有張

翰

棄前魚

回車入相門。堂下飄羅袖。雛鬟二八殊韶秀。近代歌舞  
第一名。當筵法曲爲君壽。翻教楚王棄前魚。金屋妝成  
得寵初。解得屏上秋草詠。漫云祝髮累可除。昨羨專房  
今羨入道。唯將外慕了一生。不免人間閒煩惱。

二代后

誰拾落花片。吹上春後枝。從來殊色易爲累。只合守節  
志不移。枉道君王苦憐惜。依舊梳洗度晨夕。清涼殿深  
屏作圍。仍認先皇宸筆跡。閱盡滄桑幾變更。故宮無人

月自明。夜深彈到秋風引。愁自四條絃上生。

門地賤

君王內顧恩情變。低徊深慙門地賤。西宮花落春欲空。  
千行淚洗紅粉面。茲有參與昴。疇昔衾裯伴是夢正圓。唯奈  
麻與泉。今日菅蒯亦棄捐。妾薄命。恨何已。懷君書。病不  
起。猶勝霍家小玉夢脫鞋。杯酒擲地郎前死。

想夫憐

得寵却成憂。外家相國性兇暴。避禍出紫閣。風露西郊  
誰能到。從是君王歡思無。枉勞月下使臣駒。偷聽想夫  
憐一曲。聲和松風斷又續。明日油壁歸匆匆。獨奈承恩

有限命亦窮。想見宮車晏駕後。陵前淚灑落花紅。

君死早

與君相值看花初。妾在深宮度居諸。感君情厚徊徨久。  
腸斷一紙訣絕書。定婚憑蹇修。雙栖誓偕老。旋見戰塵  
吹九重。沙場橫屍君死早。潮連鳴門月色陰。無端玉碎  
又珠沈。縱生有誰能慰藉。碧海青天夜夜心。

還十襲

月色朧朧杏花隴。春寒透衣夜欲午。悄然停車不揭幃。  
執手而語淚如雨。潘郎貌秀絕。絮語情逾真。唯道楚囚  
恥可忍。生前重逢了夙因。相思幾紙書。珍重還十襲。當

日恩愛終難忘。底事催別漏聲急。

虞兮淚

五常是後生。一曲檀槽信手彈。皇塵是往生。徽外餘韻  
聽亦難。雨浥新樹燈光翠。坐到夜深不成醉。雖少四面  
楚歌聲。尊前灑盡虞兮淚。夙因如許願已差。手翦烏雲  
便出家。曾將牡丹品渠貌。名姬傳神是何花。

橫笛詞

郎以妾故失愛于父。一朝披緇歸佛門。年少冠劍棄如  
土。梅花落地又春寒。江天煙白夜月閒。值郎欲訴心中  
苦。嵯峨野徑移步艱。忽聞經聲叩僧院。悵絕隔扉不相

見無奈罪業難消除。蓉掖榮華何足戀。入道妾亦能勤  
行郎勿倦。

貧居尼

昨爲天子母。今爲貧居尼。浮生富貴真轉瞬。仙蹤寄在  
北山陲。數株殘花白於雪。聲聲杜宇頻啼血。爲感問訊  
意太優。六道輪迴向君說。四海煙塵起兵戈。龍舟忽淪  
壇浦波。生入都門非爲福。玉貌瘦損奈愁何。皎皎天上  
月。清輝終不多。

佐藤六石招飲鷗社諸同人席上率賦。

雅會排孤悶。良朋共見招。文章憐夙業。杯酒又今宵。深

巷雨聲細。新寒燈暈搖。醉餘試高詠。窗外竹蕭蕭。

高橋午山過訪上村賣劍亦至分韻各賦。

把酒茅軒夕。清談意自閒。籬花餞秋瘦。林葉帶霜斑。縱  
目風塵外。聊生文字間。吾徒豈空死。夙志在名山。  
同心話不盡。明發促車還。四海此盟好。半生吾道艱。相  
逢喜青眼。對酌駐朱顏。別後回頭處。迢迢萬疊山。

菅公像贊爲藤井稻陵歸一郎

起自儒生。列于三台。周情孔思。和魂漢才。天人一貫。今  
古兼該。史寓褒貶。詩長翦裁。蹇蹇匪躬。治化日恢。輔弼  
勳高。羣小相猜。西海月清。北野梅開。人臣之範。文學之

蘇東坡詩集卷之七

蘇東坡詩集卷之七

蘇東坡詩集卷之七

魁

蘆雁圖

澤國秋闌霜露繁。天長地濶足銷魂。蘆花白亂風欲色。  
寒波忽涵月一痕。痛絕同侶去無跡。獨下淺渚收倦翮。  
野田難爲稻粱謀。江湖且避矰繳厄。嗚呼禽鳥猶存弟  
兄情。先後分序嗷嗷鳴。水宿沙眠奈孤寂。回頭隴雲千  
里平。生死茫茫思深契。人間如此亦揮涕。疇昔九霄慣  
奮飛。寧信今少凌風勢。隨陽來去幾時休。晨夕嘹唳易  
牽愁。汝須在瀟湘之浦。穩稽留。洲陰啄苔儘自由。不爾  
與我歸。栖窮髮之北溟海上。極目水天乃從鯤鵬游。

高橋月山招飲

窮陰傷短景。世事莫輕論。迎夜排紅燭。消寒倒綠樽。崢  
嶸一年暮。濩落此身存。想到田家裏。初梅定返魂。

送國府犀東種德出洋

故人去向大荒西。到處新詩掩淚題。百萬蟲沙悲歷劫。  
山河破碎夕陽低。

讀蔣劍人嘯古堂集。題其後。每首結用集中成句。

風流擬得謫仙狂。樂府清詞最擅場。無奈烽煙滿吳越。

茫茫花月又滄桑。

數奇仍詫布衣雄。白髮丹心不諱窮。但是憤言心血盡。

文章買禍史才空。

亂餘何處欲留蹤。地棘天荆憂思濃。末路英雄例韜晦。  
青樓聽雨寺聽鐘。

餞歲

挑燈坐到五更前。世事無端易黯然。只願邦威及殊域。  
何由穀價抵凶年。終生貧苦仍非病。驚俗文章獨自憐。  
且待鼓聲催曙色。陌頭車馬去朝天。

秋碧吟廬詩鈔卷七

秋碧吟廬詩鈔卷八

東京 久保得二 天隨

田家早梅 庚申

天作連朝暖。南枝已漏春。茅茨巧位置。物色更清新。未  
到羅浮路。旋逢姑射神。當茲墟落靜。看汝性情真。一白  
疑堆雪。孤高不受塵。影涵流水盪。香入細風勻。須引嬌  
鶯住。先將素月親。相知憐野老。同調有幽人。好療煙霞  
痼。初酬夙昔因。太和方得氣。六合轉洪鈞。

元旦訪次弟於鎌倉寓居。其翌偕游函山。

狗日晴如昨。早梅花欲闌。豈無聯屐興。能繼對牀歡。天



地催和煦谿山自鬱盤。年時鴻爪跡。一一與君看。

大地獄

絕壑饒靈異。硫氣使人噎。傾聽殷其雷。坤軸震欲折。一  
白煙騰騰。陰火長不滅。急於鼎鑪煎。坎底涌泉熱。地皮  
爲壞潰。誰鑿混沌穴。譬之如癰腫。掀張將決裂。臨眺步  
暫停。埋策戒蹉跌。日晡毒霧深。腥風更慘烈。地獄久擅  
名。乃思佛家說。陵谷幾回移。化工弄奇譎。

千條瀑

行行入山深。松筠自瀟灑。言尋猿鶴蹤。路盡懸崖下。岵  
彼樹根泉。淙淙一齊瀉。銀絲風盪搖。綏綏堪手把。耳邊

疑憂玉。塵念都可捨。餘流注成谿。礪石似屐。仍憶前  
游日。來憩消盛夏。曠覽足高吟。丘壑茲聊且。幽境不在  
廣。只憾眞賞寡。天工有餘奇。水木倩誰寫。

魁春樓題壁

自予獲茲地。一夢過廿年。每值開春節。便來賞林泉。何  
關鬢華白。林泉故依然。層閣儲秀爽。欣斷塵土緣。地獄  
硫霧暗。蓬萊松色妍。石躍蛇谿底。日射鷹峰巔。倚欄發  
遙想。逸興擬前賢。長嘯孫公和。高詠李謫仙。於焉適素  
尚。浹旬例留連。主人亦舊知。莫漫責酒錢。

金岡大中寺看梅。同仁賀保香城。成人荒浪煙崖。

坦佐藤小石

廣平只解賦梅花。例向東風發興賒。翻與人間尤冷淡。  
孤芳須在野僧家。

玉性瑤情迥不群。仍將絕艷媚東君。一時得氣齊催放。  
嫩日花香簇似雲。

一塢煙霞古寺春。梅花妝罷粉痕勻。此來且詫多仙分。  
麝盡打頭香自新。

路入招提風日殊。遷喬得意有鶯呼。一枝踈地頽唐甚。  
又似詩人醉索扶。

雪後放晴春尙遲。東風無力峭寒時。梢頭幾點花堪數。

宛作孤清冰玉姿。

暗香浮動愜吟懷。二月園林韶景佳。好個化身看髣髴。  
花間住著小仙娃。

絕代丰神著句難。清癯最怕俗人看。閒情一味堪相較。  
悄立花前忍嫩寒。

可比梁谿第二泉。夢公遺躅水潺潺。沙甌瀹茗梅花下。  
晴日當檐鶴避煙。

斜廊素壁影分明。一脈寒香晚更清。洗盡凡心消盡劫。  
白梅花底悟三生。

一從鶴駕此徜徉。淨域梅花粲有光。最喜故人椽大筆。

春風滿殿記恩香。

恩香殿記。日下勺水所撰。

謝內田遠湖見贈撫順炭髓硯。三疊坡公龍尾硯。

歌韻。

故人弄藏久珍惜。脫手而贈如拱璧。晨夕當用貴難名。  
千金塞下烏金石。憶昔清祖出師時。積七大恨誓有詞。  
撫順一捷朱明震。干戈慘禍新鬼知。勢同疾風掃氛垢。  
容易功成矜希有。遼左山河破碎餘。此石亦應劫灰後。  
鄂羅南下捲戰雲。天兵一擊靜胡塵。曼殊社稷今安在。  
不怪富源舉付人。誰剖石髓嚴揀擇。磨瑩刻削作紋畫。  
撫罷愴然感興亡。浩歌莫是身世別。

三月養痾于函山旬日。獲五律五首。

溪壑廻春處。淹留不憶家。群山添黛色。一郭發梅花。良  
醞斷猶戀。新詩吟自誇。乘晴行藥好。樵路往來賒。  
一閣饒佳景。遐觀病可忘。孤雲偏弄態。喬樹不成行。垂  
老今如此。無聊暗自傷。放翁有名句。省事是奇方。  
巾舄尋詩去。倚筇幽處看。數家作村落。四面匝峰巒。梅  
泄春光淺。天催雪意寒。投林歸鳥急。憐爾一枝安。  
俯仰乾坤小。閒中觀物情。離都塵累少。因病道心生。破  
壁燈無燄。疏檐雪有聲。夜闌孤枕穩。不復夢功名。  
逍遙從物外。興至乃高吟。身世經窮達。山河變古今。閒

雲隨野步斷澗又幽尋。松竹妍而秀。經寒翠色深。

碓日嶺

史稱武尊征蝦夷而還。至碓日嶺。東望懷橘媛。長嘆不已。其地或爲毛信境上。或爲足柄山中。而近人擬以函根宮城野村西一高岡。岡勢聳拔。遙望湘東。山歷歷。在指顧中。能與事理合。此尤足信據也。予一日登臨。乃賦此云。

走水洋上雲流墨。颶風暴起舟傾仄。海神爲祟妾當之。翻身直向蛟龍國。帝子一劍靖北邊。掃蕩蝦夷勳績全。言歸行盡湘中路。飛步獨躋玉笥巔。往事宛是眼前覩。

追慕情殷終無補。長吁一聲吾婦亡。回睇悽惻淚如雨。從來遺蹟費疑猜。此地崗隴鬱崔嵬。目斷微茫煙濤白。天自群巒缺處開。日月行邁人世替。名姬獨矜貞節厲。鶻影低迷霜氣高。海山入畫夕陽麗。

水戶看梅。同荒浪煙崖。萩原錦江。

餐罷梅花詩味幽。拖筇隨意度林邱。前身我是鄭思肖。昨夢玉真峰上游。

一把團茅好典型。賢侯手植素梅馨。湖光碧與花光白。繪出孤山放鶴亭。

名園歷劫是紅羊。仍使游春士女狂。留得乾坤清氣在。

梅花端作舊時妝。

冰雪聰明絕世容。暗香引客忽相逢。此來灑酒人多少。溼作蒼苔滿地封。

林下東風帘影輕。滿園裙屐趁新晴。梅花合在紅塵外。流水空山韻更清。

一徑苔青不著塵。好從僻處別成春。冰肌綽約瓊姿艷。豈啻幽香觸撥人。

一笑擲毫詩亦難。對花盤礴不知寒。香南雪北吟行遍。回首今春幾處看。

遲日園林鶯亂啼。一枝如雪壓牆低。厭看羅綺腥羶甚。

枉道梅花亦有蹊。

俎豆當年肅古儀。泮宮今有晚梅披。仍餘寒水玲瓏石。鳳翥鸞翔筆勢奇。

上市下市屋聯比。東園西園梅亂開。一路紅塵殘照麗。無人不道看花回。

佐藤六石招飲

詩酒縱清興。不關春已歸。終風寒較緊。萬樹綠成圍。志士頽顏早。心知會面稀。功名餘白髮。俯仰半生非。

席上初晤伊藤鴛城。三郎賦似。

多才誰似汝。相值共開顏。談向尊前劇。心從花後閒。清

吟擬王孟。妙畫趁荆關。底事忽忽別。明朝匹馬還。

高橋月山招飲

園林花後淨。杯酒此聊生。環屋皆新樹。鉤簾恰晚晴。世途每加險。文士漫相補。大雅遺音絕。江湖誰主盟。

五續十臺懷古詩

白首龍鍾西入周。豹韜一握足奇謀。縱成文武當年業。獨奈夷齊百世憂。斧鉞行誅臨牧野。魚鹽有利拓營丘。此間曾引安車路。閒却礮谿碧玉流。鈞臺  
洙泗文章長不泯。聖賢與我卽同倫。終生志爲風霜苦。萬古道從窮餓真。城險黃河還北曲。沙寒白日忽西淪。

倦游十載歸來晚。驛路長愁車馬塵。厄臺

當筵趙女錦成圍。連勝功高主父歸。不怪富强六雄服。

何圖嫡庶一猜非。天低代北催秋氣。山界秦中帶夕暉。

末路最憐遭慘禍。沙丘雀鷲獨歔歔。叢臺

風雲草昧靖南荒。椎髻文身瘴癘鄉。去國關心賸墳墓。

登臺得意著冠裳。雨過五嶺林花白。日落一天潮氣黃。

形勝自然堪割據。尉佗何敢比高皇。朝臺

睢陽曲罷有餘哀。萬乘旌旗去不回。歌哭他年會高李。

文章千古憶鄒枚。桐門日暮煙初合。棘澤天寒雪欲來。

河洛于今傷戰亂。可堪劫後弔荒臺。吹臺

風流遺躅易傷心。晚向金花市畔尋。亂草蟲聲和露溼。  
疏桐月色與秋深。絕憐才子漫多事。賴有佳人偏好音。  
歸鳳求凰莫相負。茂陵却唱白頭吟。琴臺

諸公勳業軼蕭曹。築得雲臺拔地高。路入崑函驅虎豹。  
江通巴蜀進旌旄。列侯旣飽宴游樂。聖代寧忘征戰勞。

滿目滄桑人事換。洛陽宮殿亦蓬蒿。雲臺

瓊華島上彩雲橫。百尺妝臺接玉京。監戶出身不嫌賤。  
掖庭進祿有餘榮。野花錯認釵頭小。秋水偏疑鏡面平。  
才調居然傳好句。依依月傍日邊明。妝臺

傳車北向路悠悠。臺下悲吟淚不收。疇昔孤舟事方往。

如今一死志堪酬。新墟井邑非周土。勝國君臣盡楚囚。

回首臨安千里隔。滿天風雨慘於秋。魚臺

何來殺氣變乾坤。閱世興亡跡尙存。誰勸兒皇割邊地。  
頻驚胡騎滿中原。風生紫塞悲笳動。秋到白溝征雁翻。

緬想高人劉夢吉。登臨當日賦銷魂。易臺

古詩六首

每首起皆填漢古詩逸句。第三首四句。其餘二句。卽  
楊慎張之象等采擇而載其書者也。

庭中有奇樹。上有悲鳴蟬。涼飈驟蕭瑟。吹到玉階前。太  
陰生殺氣。群物不復全。寒花次第凋。誰保顏色鮮。玄鳥

逝已盡。征雁飛相聯。河漢流當戶。白露滌高天。四時頻  
推移。奄忽歲月遷。人無金石壽。祇恐百憂牽。從容隨物  
化。夜臺夢應圓。愚者徒貪生。餌丹希神仙。

泛泛江漢萍。飄蕩永無根。伊余命不淑。千里遠駿奔。荆  
吳頻移棹。幽燕又停轅。憂傷輒成病。幾回變寒暄。終到  
長安市。欲千萬乘尊。奏牘果何益。九重隔紫闈。原非封  
侯相。誰招久客魂。十年衣已敝。三寸舌猶存。乃思歸故  
里。步出城東門。用之如猛虎。舍之如孤豚。

青青陵上栢。傾葉晞朝日。陽春被惠澤。枝葉尙攬結。憶  
妾初嫁時。良人茲同室。極宴多歡娛。倚牀理清瑟。知君

有行役。一朝愴遠別。獨宿揭羅幃。掩泣看秋月。羈旅定  
多苦。音信何由絕。願勿誤歸期。復值嚴霜節。明鏡帶暗  
塵。容華輒衰歇。爲抱區區誠。徒令五情熱。

餓狼食不多。餓豹食有餘。清廉夙所尙。貪婪非吾徒。賤  
士乏黃金。紈袴昧詩書。高才常跼蹐。巧宦只讒諛。故人  
垂朱紱。振翮游雲衢。意氣凌王侯。出入乘軒車。再逢乃  
背面。棄我在窮途。性僻寡所合。奈此七尺軀。君子重晚  
節。韜光謝虛譽。豈若披短褐。田業守舊廬。

蝴蝶游西園。暮宿桑樹間。晴晝尋芳忙。雙雙粉翅妍。佳  
人方獨處。窈窕好容顏。懷春情思婉。羅巾溼不乾。簾前



百花發。靜夜月皓然。清商歌初起。玉指撥水絃。長安繁華地。游俠多少年。日日勞媒氏。爭求室家歡。女子羞再嫁。著意擇所天。莫臨河之澗。復戀山中泉。

天霜木葉下。鴻雁當南飛。玄冥鎮朔方。晨夕寒增威。歲闌促短景。白日潛光輝。平野已掃蕩。北風吹入衣。末俗不相容。吾道何以非。蹉跎世途險。寂寞知己稀。逐利者矜富。躬耕者苦饑。頭白面有皺。四海無所歸。陰陽迭消長。常住寧可希。避禍全其命。聖人貴知幾。

擬唐人五言八韻追和顧亭林

子胥必覆楚。包胥必存楚。今日爲仇敵。昨日相爾汝。掘

墓鞭王尸。使我亂心緒。天定能勝人。誰容汝暴舉。吳兵

滿郢都。山中難獨處。七日立秦廷。慟哭不能語。迎彼五

百乘。稷丘乃振旅。國危有此臣。絕勝百夫禦。申包胥乞師

荊卿報太子。漸離報荊卿。聞道咸陽宮。秦王繞柱驚。秋

風燕市飲。和君浩歌聲。白日易水別。餞君千里行。遺志

今可繼。何暇論死生。惜哉舉筑時。兩目矐不明。笑爲刀

下鬼。窮泉復尋盟。耿光照青史。與君甘盜名。高漸離擊筑

貧中看奇相。燕頷而虎頭。投筆自慨嘆。欲倣博望侯。當

初卅六衆。一舉服虜酋。艱苦三十年。勳業誰與儔。乃至

條支境。歲時朝貢修。何圖旋京後。胸脅病不瘳。一門皆

才雋有子足箕裘。將略憾無用。廟議少遠謀。班定遠投筆

托孤任非輕。攘除存夙志。堂堂諸葛公。六師來捲地。渡

瀘入不毛。一擊殄耆帥。孟獲服天威。滇池始敷治。七縱

而七禽。誰言類兒戲。後顧今絕憂。又見資儲備。炎運期

興復。誰料皇天意。再出北伐師。不似南征易。諸葛丞相渡瀘

神州已陸沈。胡騎紛縱橫。乃擊渡江楫。誓欲復舊京。譙

梁新拓地。雍丘進屯營。士卒同甘苦。糧仗有餘贏。誰來

居我上。感憤心難平。內訌機亦迫。思之涕泗傾。一朝齎

志逝。大功終不成。當初聞雞處。誤道非惡聲。祖豫州聞雞

折腰五斗米。居常愧違己。口實固分明。完節誰相比。寄

奴近專權。時事可知耳。我豈居其下。趨走甘頤使。在官

僅八旬。棄之如敝屣。江上舟遙遙。潯陽歸故里。田園樂

天命。終生不復起。解事有文公。大書晉徵士。陶彭澤歸里

峰尾大休華。甲壽言集宋人詞句。

老僧拍手笑相誇。壽紀應須海算沙。面壁九年看二祖。

雙頭蓮子一時花。辛棄疾。張孝祥。黃庭堅。張先。

三韓樂府二十闋

會蘇曲

六部處子花粲粲。王女出房頻宣喚。廣庭續麻競輸贏。

七月鳴鴉聲不斷。他日陳百戲。勸酒交挪揄。宮商宛轉

會蘇曲月下嘉俳足歡娛。我筐亦盈可繅可織。杼軸豈敢廢婦職。祇願君王當寧致昇平。經文緯武霸東國。

好童死

昨傳解明死。今見好童死。嗚呼好童美而仁。矧又樂浪獻凱功無比。終古懼受不孝名。一死已分身命輕。嫡母讒何深。釋之洵不易。執于小謹。昧于大義。申生扶蘇卽同倫。惜哉此輩於道未爲至。君不見日殺子者瞽瞍頑。焚廩揜井事事艱。唯舜克諧烝烝乂而不格姦。

高福章

丸都地震昨摧城。豹鬣虎尾王夢驚。夙知王弟懷異志。

盍顯言之懲驕恣。王曰嘉汝社稷功。天之曆數在汝躬。王弟登祚果無道。一朝臨刑恨不窮。吁嗟乎右輔已死左輔去。王之二子今何處。

都彌妻

玉璫象締清且揚。恨將殊色禍吾郎。當初君王唯相戲。如何翻作狂童狂。郎目旣矐無所見。孤舟隨潮疾如箭。頓足痛哭又尋蹤。江口波高變魚龍。至誠通天神呵護。泉城島上忽相逢。逃虎口。去故土。日乞食。慣貧窶。都彌妻。節殊苦。

師彘山

勿稽子。萬夫雄。王孫忌之不錄功。烈士豈求名。勵志待  
時隴畝中。竭火城頭鼓聲急。力戰斬獲幾十級。數奇極。  
賞弗及。悔吾未能捐身聞於人。何能厚顏世間立。被髮  
去攜三尺琴。師彘山中嵐翠深。澗流淙淙樹瑟瑟。聽風  
聽水寫清音。

竹長陵

伊西寇。金城圍。樓櫓摧兮壘壁壞。我軍禦之計已非。蔽  
野而來者何騎。娟娟竹葉綠爲珥。所向無前虜兵奔。戰  
血漂杵欲無地。先王至治能愛民。居然園陵儼有神。明  
朝竹葉成堆處。日射虛殿五雲勻。

陸石馬底可擬。明兒竹葉爲珥。

憂息曲

憂息曲。憂息曲。兄弟相見歡娛足。獨憾盡忠人未歸。罷  
酒悽惻淚相續。三寸舌。感麗王。一葉舟。賺倭皇。炮烙之  
刑極。慘毒。周苛怒罵真剛腸。可憐嫠婦趁蹤攜二女。海  
天目斷亂心緒。蓬萊清淺何時乾。鷓述嶺頭石不語。

杵聲長

百結先生貧亦宜。高操夙慕榮啓期。鄰里春粟我獨否。  
絕憐病妻老且癡。須知斯生天所眷。富貴浮雲何足羨。  
去往彼此不相關。人間歲月如流電。我有一張琴。愛之  
久珍藏。纏以朱絲之絃索。貯以綠玉之錦囊。成連海上

神仙調爲汝彈出杵聲長。

烏銜書

天泉亭畔停鑾輿。慈烏飛下口銜書。不開一人死。開視  
二人死。開視心猶疑。歸宮放一矢。始知王妃作狎邪。妖  
僧匿在琴匣裏。他日碧花承恩多。白龍魚服頻經過。畢  
竟色荒爲慙德。莫怪古陔老嫗笑。且呵疇昔糯飯祭烏  
了。記否宮闈禍非小。等閒聽過啞啞聲。景陽鐘動天初  
曉。

墓中諫

馳騁田獵使人狂。外作禽荒國則亡。太息吾王不容諫。

老臣臨死恨正長。佳城鬱鬱當大路。三魂六魄何處住。  
墓中有聲君臣驚。宛似連呼王母去。能教王感悟而涕  
淚零。絕代忠節耀汗青。吁嗟乎史魚屍諫差可擬。龍逢  
比干鬼不靈。

方外志

謝塵世。自清淨。身無累。心無競。同好有友相與娛。頗似  
向長與禽慶。洶湧三十萬頃之波濤。眼見天地等秋毫。  
歷盡鼇背鯨身險。回頭蓬壺蜃氣高。料知鞭鸞控鶴飛  
步穩。吳越山川頻往返。更欲服石求延年。五嶽尋仙不  
知遠。

破隋師

九路隋兵吾何怖。鳴綠之水任汝渡。天清野曠四望同。  
草木蕭蕭萬馬風。一日七走頻誘敵。看汝已墮我術中。  
待汝班師。四面掩擊如拉朽。乘汝半濟。徑截輜重襲其  
後。將軍授首士卒奔。可憐三十萬衆十亡九。平壤城奏  
凱回。遼東野地可開。高句麗今憑公活。吁嗟文德文武  
才。

名竹竹

大耶城。千軍合圍勢日蹙。將士出降被敵欺。陰風慘澹  
鬼夜哭。獨收殘卒守者誰。幢下舍知名竹竹。戰則死。降

則生。竹兮歲寒長持節。吾守堅貞不汚名。當初貪色內  
難起。都督官高終無恥。

丕寧子

上報家國。下報知己。單身健鬪不迴踵。神勇第一丕寧  
子。子爲父死。奴爲主死。闔門幾個真男兒。馬革裹屍亦  
足矣。士氣一振何勁悍。攻守易地勝敗判。勢如破竹進  
斫營。頓教烏合爲鼠竄。三城圍解始蘇息。仍有鬼雄長  
護國。反知山下三尺墳。忠魂夜出呼殺賊。

陽山歌

殺氣蔽天夜色黑。太白狂流月亦蝕。鼓聲動地轟於雷。

和碧川原詩錄 卷八 一五  
猘獠百萬來相逼。衆寡懸絕難抗衡。丈夫報國豈求名。  
手及數賊力既盡。泰山一擲鴻毛輕。大監小監齊殞命。  
幢主慷慨不苟生。陽山歌調太苦。嗚呼生爲天潢親。死  
爲疆場土。王子興師。修我弓弩。壯士拊膺淚如雨。

望海亭

泗泚河水血樣紅。西岸葵吠向王宮。蝦蟇數萬集樹杪。  
玄雲如龍鬪空中。百濟亡。鬼作語。龜背識曰同月輪。老  
巫費解互齟齬。君王狃勝氣驕盈。皇天下譴猶不驚。既  
見淫虐同桀宋。終負海東曾子名。畫簾涼搖銀燭影。緩  
歌慢舞忘夜永。君不見半月城寂早鴉啼。望海亭上秋

佩冷。

成忠言

炭峴白江國之保障。一夫守之。萬夫無當。大王深閉而  
固守。糧盡兵疲。敵自僵。觀時察變。良有以。向來佳兵徒  
爲爾。絕憐忠臣愛其君。獄中上書餓而死。嗚呼形勝爲  
誰存。果然萬騎捲地奔。扶餘孤城圍合早。溫祚山河白  
日昏。君王噬臍嗟何及。只悔不用成忠言。

一階伯

臨軍約束忘其親。起援枹鼓忘其身。矧殺妻子期必死。  
我衆亦勝句踐五千人。貔貅昨屯黃山下。西風掃蕩捲

大野四戰皆捷氣益振三路羅兵胡爲者獨奈孤軍援  
絕墮重圍魯陽戈折運已移縱令毅魄留天壤忍見石  
頭豎降旗可憐七百年社稷歌樓舞殿倏無跡血染竹  
帛長不消殉國唯有一階伯

落花巖

大王浦黑夜路不分白馬江怒潮打岸聞幾多宮娥徒  
跣走爭以深淵作高墳明日熊津亦失守面縛銜璧無  
恥否休將薄命悲遭際免看青衣起行酒扶蘇山色斜  
照幽釣龍臺畔暮雲愁個個嬌魂歸何處巖花自落水  
自流

金庾信

中嶽神仙授祕籍咽薄山頭靈光赫天生庾信輔太宗  
一體君臣互裨益娘臂戰昆曇誅早歲已見功勳殊怕  
婦天子歸藥籠共亡濟麗拓版圖當其軍門叱唐將怒  
髮衝冠雙臉朱統一之業方就緒萬民永免鋒鏑虞星  
隕地震人驚走厄在臣身王无咎陰兵離宅臣其死龍  
駕問病意何厚苟念守成難何疑國祚久分明一語垂  
身後歷事五朝壽七十九嗚呼謀如子房智不窮忠如  
諸葛終始同新羅治世九百九十歲將相全才唯有公  
悼亡十首集宋人詞句唁關澤霞菴



不知更子是何年  
香如中字情誰得  
時克地恨世垢深  
劉印習仙  
平時五夜似死年  
人全不似月初圓

鬢絲添得老生涯。已是情多怨物華。露溼芙蓉花上月。

○**涼如水**○**豆窓紗**。辛棄疾石孝友。毛滂賀鑄。魏少五。

香篝漸覺水沈消。枉把吟箋寄寂寥。銀浦無聲雲路渺。

忍孤風月度良宵。辛棄疾失名。高觀國李珣。

賸衾閒枕自無眠。腸斷西風十四絃。緬想舊歡多少事。

涼宵如水又如年。黃機辛棄疾毛熙震石孝友。

天邊金鏡不須磨。點破清光景趣多。一向無言但垂淚。

惜紅愁粉奈情何。吳文英石孝友黃庭堅歐陽修。

畫眉人去掩蘭房。夢裏浮生足斷腸。怨盡朝雲還暮雨。

楚天無處不淒涼。王武子晏殊趙彥端柳永。

心似長檠一點燈。如今魂夢苦無憑。朱欄夜夜風兼露。

縱有高臺常怯登。呂渭老陳克歐陽修陸游。

幾回垂淚滴鴛衾。燈暗香消夜正深。何事不歸巫峽去。

而今仙跡杳難尋。顧夙黃機歐陽修姜夔。

思君無計睡還醒。十二彫窓六曲屏。數點雨聲風約住。

那堪深夜枕前聽。魏承班高觀國李煜李珣。

綠綺空彈恨未平。小窓孤燭淚縱橫。星星却入雙蓬鬢。

一滴秋霖是一莖。黃機顧夙毛滂李之儀。

老懶心情萬事休。此時誰與說新愁。可憐又溼西風淚。

紅藕香殘玉簟秋。方千里陸游高觀國李清照。

金風輕透  
此名定也  
如少如

八月將游讚州有作

故人遲吾久。豈謂道途艱。雨霽三薇國。秋高五劍山。文章要傳世。杖屐好乘閒。廿載游蹤舊。翻憐兩鬢斑。

琴平客舍賦似三谷象雲 穆疊韻

舒嘯樓居好。寧知旅食艱。涼風出深樹。暮雨失遙山。對酒談方劇。賞秋吟未閒。與君候新霽。郭外走黃斑。

象頭山祠

象頭山色翠岩堯。步履登臨下界遙。畫壁蛟龍風雨過。闕宮觴豆鬼神朝。松杉夾路遮紅日。殿閣凌雲接紫霄。手薦澗毛稽首久。恍聽爽籟似吹簫。

清少納言墳

殿角雪霽撥簾時。天顏有喜罷宴遲。果然聲價冠宮掖。慧心諳得白家詩。一枝彤管亦孤詣。往往諷刺穿微細。壓倒雜纂李義山。好與紫史併傳世。環堵蕭條歲月閒。白髮青裙末路艱。仍矜馬骨千金貴。郎署群少齊汗顏。海南今日弔陳跡。斷碑字滅苔暈碧。料識飄零辭帝京。風餐露宿老幽僻。人生畢竟慙無聞。其奈榮枯轉瞬分。悵望千秋一破涕。才命相妨不獨君。

展日柳燕石墓

博徒而嗜詩。詩人而勤王。韜晦避指目。却恐名姓揚。矮

秘碧吟廬詩鈔 卷八 一州  
軀膽如斗。時事頻慨慷。頗類魯朱家。用俠庇逋亡。一朝  
罹羅網。赭衣坐陰房。鄒衍銜冤甚。六月疑飛霜。幸值中  
興盛。瞻仰天日光。鳳詔忽徵起。得意候廟廊。去從北伐  
師。玉帳草檄忙。戟手呼殺賊。垂死氣更昂。千里齎爪髮。  
歸葬卽此鄉。魂兮定感泣。旌褒聖恩長。我來薦蘋藻。郭  
外晚吹涼。殘碑苔已碧。故隴草欲黃。江山賸生色。精爽  
彌大荒。不與君同時。俯仰淚溼裳。

題濤聲嶽影樓爲原雁泉友已

壺山兀在東。青峰鬱在西。南望蓮嶽小。墟落嵐氣迷。秧  
田北盡處。鹺戶傍沙隄。一川潮正漲。海光漾玻瓈。七島

森羅列。煙鬟臨水低。漁歌晚相答。遠近帆影齊。主人真  
超俗。軒冕如塗泥。桑梓歸臥穩。何必求巖栖。甫里記皮  
陸。竹林思阮嵇。除却同調者。門前絕輪蹄。今我攬勝概。  
佳期無阻睽。拍欄浩嘯罷。壁上詩可題。

白峰陵

一從戰血漲皇衢。兵革續紛世運殊。玉璽已移天北極。  
鑾輿俄幸海南隅。九秋草木風聲壯。絕頂樓臺鳥道孤。  
愁見蒼梧雲不散。陵前日暮獨踟蹰。  
踏閣攀林磴勢危。寢園寂寞土花滋。二儀風雨威靈顯。  
四國山河歲月移。玉几金牀歸昨夢。曉猿夜鶴有餘悲。

樵門日落海波白。目斷舊京天一涯。  
南荒風物故蕭騷。驀地秋聲萬木號。翻痛真龍向魔道。  
誤傳天狗是仙曹。玉魚入土松楸古。金榜懸門廟宇高。  
試上岡頭放眸望。群山趨伏亂于濤。

宿白峰寺

君平

晚宿峰頂寺。虛堂一清敞。微涼殊可人。開牕納萬象。雨  
過樹如沐。白雲猶來往。澗陰拖暝色。石氣和秋爽。延囑  
愜素心。塵外縱幽賞。群籟寂而沈。山廚泉溜響。雪甌茶  
可烹。對僧頻抵掌。坐久靜思詩。緬焉生逸想。

題三野二山

良

能遷山房。次見似詩韻。

幽居雞犬亦翛然。日午徐颺茶竈煙。但道桑麻宜活計。  
始知巖穴有遺賢。琴書一榻靜中賞。風月百年塵外緣。  
傾吐積衷成快晤。不深庭院早涼天。

鼓岡懷古

保元之變何忍說。王綱解紐彝倫絕。骨肉相讎上下同。  
父子弟兄叔與姪。長袖誤事竟無功。八郎徒矜膽氣雄。  
殺聲夜震白河殿。四門晨啓劫火紅。玉輦淒涼狩南土。  
一邱草木蔽環堵。浮雲天末隔神京。烏頭未白宸衷苦。  
疇昔記夢夢空醒。懺罪行香厭有形。消盡煩惱修冥福。  
手寫五部大乘經。欲慰思歸情繾綣。底事斥之違我願。

面骨崢嶸髮如蓬。切齒瞋目常銜恨。生入惡道爲魔王。  
橋山他時劍烏藏。賸見茶毘煙一片。關河渺渺斜日黃。  
八道兵戈血滿地。果然積憤終成祟。黑鼠化虎九重愁。  
鬼武稱霸竊名器。卽今恩怨兩不存。料識兜率住御魂。  
威稜只合扶家國。伏臘享祀儀禮尊。拜瞻龍袞又凝想。  
白日天高秋色爽。萬壑松風七百年。野水猶作佩環響。

擬古堂觀讚岐國廳古瓦引。

瓦如剖竹長過尺。其質堅緻欺金石。主人好奇久藏之。  
十襲豈啻荆山璧。憶昔大化革新年。始張紀綱廟略宣。  
區劃國土置司牧。乃檢戶口試班田。降至大寶典章備。

糾彈權屬按察使。無復豪強事侵陵。四海謳歌唐虞治。  
維讚之州品物豐。微嫌健訟輒成風。政化每賴神明宰。  
前有紀公後菅公。紀公書聖知名早。疲駿忽馳千里道。  
借寇民喜義倉盈。暮夜却金貧亦好。菅公才德真碩儒。  
一下傳車底績殊。釋菜開學絃誦盛。香幣禱雨禾苗蘇。  
居然二公存餘澤。獨奈晚節共遷謫。或過境上聞哭聲。  
或顧舊州行海舶。郡府沿革又回頭。封建已過幾百秋。  
卽今幸逢聖明世。隨處墟落炊煙浮。國廳跡在綾河澗。  
四塞青山形勝古。午風吹颭稻花香。隴樹蒼蒼藏宿雨。  
我撫片瓦感慨長。遺聞與誰細評量。絕憐微物享高壽。

冷看人間有滄桑。

琴彈祠

臨眺停筇處。崇祠占一丘。潮光盪晴日。松籟入涼秋。爲有海山勝。能消羈旅愁。滄溟如可絕。去躡六鼇頭。

一夜菴

溶溶染川澗。峨峨琴嶺麓。鑑公所寄蹤。淨域存茅屋。行營墜將星。孤臣帳下哭。一朝披袈裟。勇退拋世祿。剃髮從休師。執役如奴僕。悟道初了生。肥遯在山谷。曾自鎮西還。住此慰邁軸。山輝水映處。嘯傲縱心目。俳諧苦鍊句。才思方圓熟。流風足千古。藝苑有餘馥。蕉翁亦傾倒。

出處共私淑。佳城賸坏土。林丘四廻複。高操誰等倫。故墟莫侵瀆。伊余雖殊塗。終然同歸宿。

次韻酬上野耕村大見寄

抱琴未道賞音稀。隨處優游逸興飛。但怯江湖秋水至。西風明日一帆歸。

栗林公園

紫雲山下好園林。十又三陂秋欲深。隨意逍遙雙短屐。有時俯仰一高吟。風生岸汜荷香遠。日入崦嵫竹氣陰。且就旗亭沽薄醉。簾波漾處笑披襟。

嵐氣蒼茫綠四圍。通幽一徑屐痕稀。靜宜鶴性巖松仄。

涼入魚腮水荇肥。既向邱園尋舊夢。何關城市有危機。  
芙蓉紅膩葵花澹。天繪秋光住落暉。

六甲山苦樂園訪福田眉仙

勝游賽前度。涼味可吟情。笑與故人酌。靜看明月生。  
江山浮露氣。梧竹帶秋聲。坐久怯衣薄。當欄河漢橫。

重過芳山

斜日西風涕淚零。延元陵下此重經。萬櫻葉爛黃如雨。  
抵死蟬聲不可聽。

芳雲館夜坐

亂峰四合勢峻嶒。倚盡谿樓月未升。過雨痕霑陵樹黑。

老梟聲出夜雲層。

笠置館偶得

孤枕客夢醒。中宵披衣起。滿庭露欲流。月逗林樹裏。  
絳淒引秋。緩步移吟屣。微風拂面涼。終到河之涘。  
墅火數點青。隔岸群山峙。魚龍寂不驚。蒼煙浮夜水。

游佐野瀑園

赤日當午爛。秋暑<sup>如</sup>焚。村徑西盡處。名園絕塵氛。  
水木一明瑟。穩栖魚鳥羣。停步臨碧澗。瀑響駭耳聞。  
銀河俄然決。峭壁懸流分。五龍攫珠躍。飛沫結作雲。  
潭間盤渦急。亂水去沄沄。天風過松頂。滿地嵐翠紛。  
微吟倚亭

秋碧吟廬詩金 卷八  
檻適意欲何云。乃憐下界鬧。人聲疑聚蚊。河朔飲方好。興酣惜斜曛。巖花碎而落。衫角餘奇芬。

輓高橋月山

同心同學又同鄉。疇昔高才列廟堂。濟世經綸歸法術。安邊奏議有文章。騎鯨月下跡何杳。聽雁燈前愁正長。從此風塵奈吾獨。子山思舊意淒涼。

題伊東聿水樂山莊

連岡北邊奔。譬之馬脫輓。起伏轉到西。函嶺簇峭碧。一頓爲鶴岬。豆南引餘脈。大島大如拳。縹緲煙波隔。海山相輝映。中著環堵宅。冬煖而夏涼。風土殊暢適。矧又園

林幽。日涉頻移屐。臘前梅可賞。霜後橘可摘。我從京洛來。恰值高秋夕。倚欄待月升。一醉談笑劇。顥氣入苧衣。灑然煩襟釋。安得鼓枻去。共作釣鼈客。

始任圖書寮編修官詩以志感

久嗟身計逐飄蓬。敢道青雲有路通。奉檄心情等毛義。輸人名位似揚雄。江湖滿地游蹤舊。歌哭多年世事空。好遣黃香詣東觀。餘生更積讀書功。

題梨堂相國眞蹟祭楠公文書幅。鬼木氏囑。

天子將謁畝傍陵。大詔一下宣膺懲。志士額手齊翹望。天旋地轉啓中興。誰圖廟議一朝變。驚聞雄藩蒙嚴譴。

初和稿



誰相  
雌霓橫空白日陰。緹騎旁午奔如電。朱門深鎖夜寂寥。  
街鼓聲斷雨蕭蕭。七卿倉皇辭京去。西指山陽道路遙。  
維公才略世無比。鸞鳳枳棘恨何已。一片丹心誓七生。  
平昔尙友唯楠子。酌向九原陳厥詞。願揚國威莫愆時。  
至誠相感神來格。君蒿悽愴宛見之。機槍墜地陣雲黑。  
千里間關歸不得。客舍無聊重染毫。欲眎何人盡胸臆。  
復古業成日月明。輔弼勳高致昇平。外夷偏恐開邊釁。  
兒童亦知相國名。當初剛銳動爲累。圭角漸磨風神異。  
顏筋柳骨自從容。果然斯人作斯字。君家祖翁性忠純。  
君亦慷慨肺肝真。一紙恰副欽慕意。晨夕挂壁墨香新。

近來善書誰卓落。多守古法甘羈縛。豈若方正兼勻圓。  
千秋浩氣此磅礴。

修學院離宮

離宮占得好林邱。魚鳥狎人隨意游。壽月觀前殘桂馥。  
洗詩臺下亂泉流。拂煙松翠濃於黛。臨水楓紅爛作秋。  
更喜四郊禾稻熟。黃雲斜日起村謳。

曼殊院

法堂僧不在。祇樹鳥空啼。獨立西風裏。諸天落日低。滄  
桑真轉瞬。泉石有餘悽。誰信當年盛。皇孫此寄栖。

賀茂祠

秘碧吟廬詩鈔 卷八  
崇祠分上下。其間隔數里。清晨鴨漚行。一路平如砥。畫垣環殿長。廊廡丹青美。廟貌自森嚴。神威誰可擬。曾作帝城鎮。伏臘儼禋祀。此來薦谿毛。階前拜且跪。樹色翠四圍。泉聲洗塵耳。煙嵐變朝昏。咫尺神山峙。林鴿呼午晴。野步忘移晷。村塢稻雲堆。都在秋色裏。

訪高野竹隱

清雄席上賦呈。

洛東山水闢仙區。獨立悠然嗤世愚。不怪坵壇盛名在。寧嗟雅頌嗣音無。放翁最得性情正。坡老夙矜才力殊。相值好將懷抱吐。當筵抵掌又酣呼。

舊內裏

麥秀傷殷墟。黍離悲鎬京。赤縣等傳舍。每見社稷輕。神州與之異。日月終古明。皇統唯一系。威德覃八紘。一千年國都。廿餘世帝城。四門高崑崙。紅暎射彩甍。紫宸面正南。居然規制宏。階前翠鬱茂。右橘而左櫻。殿上法座高。七寶雕鏤精。觀闕競輪奐。觚稜聳崢嶸。賁墉儼四匝。滿地沙晶晶。中天分黃道。御氣聞餘清。想當朝會日。鴈鷺先後行。衣冠襜如肅。劍佩鏘爾鳴。昨我班史臣。解褐拜恩榮。乃欲檢圖籍。欣然賦西征。精華東璧聚。碧簡柱下盈。金題與玉軸。瑞光照丹楹。日日盡晡出。恍然遺世情。迴看苑樹外。朱霞繪秋晴。

秘碧山房詩金 卷八  
三井寺絕頂

園城何代寺。往事首頻回。形勝餘斜日。登臨有古臺。亂山三越遠。積水太湖開。欲訪殘僧屋。松蹊一磬哀。

粟津懷古

一角湖山顥氣高。西風落木捲平臯。沐猴而冠雖相似。輸著烏江死最豪。

清水閣

綏邊軼衛霍。桓桓阪上公。爲遂高僧願。移宅作梵宮。奇巧疑鬼設。迴廊如在空。泉聲鳴深壑。脚底聽驚風。川原開畿甸。依然形勝雄。萬戶煙火盛。禁樹青葱葱。塔影分

遠近。墟落斜照紅。穠稔黃始熟。四望秋色同。此來起壯志。可兒性<sup>性</sup>是豐。誓欲吞赤縣。乃教國威隆。予懷緬往古。興廢恨莫窮。顥氣入衣冷。目送天末鴻。

方廣寺古鐘

國家安康。是截我名。君臣豐樂。是欲兼併。銘辭容易。供口實。兩年連動十萬兵。可憐金湯化焦土。乃道偃武致太平。欺人寡婦孤兒。狐媚以取天下。昔者石勒尙羞之。照祖老獍胡爲者。三百星霜夢裏過。將軍勢燄竟如何。于今巨鐘晨夕響。偏爲豐家訴冤多。

小督墳

嵯峨野徑殘蛩語。滿目西風亂禾黍。墟落無人一笛遙。  
欲訪遺蹤迷處所。聽琴橋下水潺潺。法輪寺裏鐘幾杵。  
當面龜山翠作堆。夕陽影澹低平楚。土花碧溼三尺墳。  
弔古低徊亂心緒。千秋嬌恨宛相同。青塚曾葬漢宮女。  
吁嗟乎。賦命窮薄不尋常。昨出紫臺卸紅妝。使臣月中  
舉鞭處。夜絃韻和松風長。重來披緇老草邱。玉貌化作  
北山霜。仇家寵姬亦遯世。近有蘭若號妓王。想見淒涼  
寒食候。畫眉聲聲易斷腸。可憐墓前無麥飯。棠梨花落  
雨吹香。

嵐峽

林麓履綦絕。石路斷復連。行見洞壑異。始知地勢偏。西  
風簸枯葉。商音一泠然。四圍蒨翠裏。幾株早楓妍。白雲  
得所依。數峰兀當前。危磴拾級上。振衣立層巔。大悲閣  
仍在。架構久經年。佛古帶苔鬚。僧瘦聳山肩。驚禽非一  
吭。飛向落日邊。餘霞漾在水。川光更澄鮮。下險更買舟。  
短橈逐細漣。慨焉發孤詠。迴睇時扣舷。

千鳥潭。卽建禮門院仕女橫笛赴水處。

女約亦難負。父命亦難違。郎擲弓箭披衲衣。誰圖牛女  
爲參商。當日恩愛一朝非。夜月黃昏梅津里。佳人停步  
春寒裏。燈火經聲認僧居。相見無因情何已。驚鴻一去

跡空尋。免殉龍舟西海沈。百尺湫潭水迴湫。試比妾恨  
却不深。

北野祠

紅梅殿上別離淚。都府樓前遷謫悲。料識忠魂歸在此。  
丹簷碧瓦繪崇祠。

金閣

將軍戊戌生。其字皆從戈。戈戟平禍亂。兩朝始講和。位  
極人臣榮。驕盈竟如何。封冊受王號。青史貽辱多。暮年  
愛禪寂。卜築北山阿。金閣凌雲起。安樂此有窩。林泉開  
勝境。巒嶂碧嵯峨。池面蘋香漾。斜陽帶煙蘿。遺構却朴

素。矧被風雨磨。寧知時俗愚。豪侈百倍過。雖因居下流。  
鄙儒論亦苛。我意一悽惻。曳縱行且歌。

雨中出洛賦似五弟正夫

勝地行吟共倚筇。離愁今日酒同濃。第三橋畔霏微雨。  
暝了東山何寺鐘。

尊酒偏期後會同。與君分手又匆匆。鴨河隄上千株柳。  
總在零煙碎雨中。

與次弟奉母游函山

高岡車可驅。無復征途艱。聊欲慰母心。駕言入函山。煙  
霞開仙境。泉石非人間。當面山簇簇。洗耳水潺潺。萬樹

秘碧吟廬詩鈔 卷八  
經霜赤林端斜照殷。隔谿聞斧響。倦鳥向晚還。幼隨海南行。筍輿度故關。四十換葛裘。嗟兒雙鬢斑。爽氣滿襟袖。秋色映慈顏。夙志今始償。此喜與弟頒。

謁明治神宮

爽塏面陽位。咫尺隔帝闈。禁籞幾重匝。闕宮儼有神。緬想中興後。閭闔天日新。雨露所霑被。海宇服至仁。憲章已制定。乃期風俗淳。兇暴連膺懲。茲見兵馬振。其德無以名。其澤長不泯。鼎湖遺弓在。群黎思慕頻。稜威宣中外。粢盛供昏晨。蒼蒼竹樹鬱。欸欸魚鳥馴。稽首拜龍袞。清風拂九旻。微臣是何幸。久爲明治民。

朝鮮中樞院參議劉猛柳赫魯趙重陽鄭丙朝諸

人。東上觀光。總督府員。觴之于富士。見軒併招集。都下名流。予亦與焉。乃賦此。

萬里齊霑雨露仁。西來觀國豈無因。珠槃玉敦宜高會。橘綠橙黃恰小春。客自席間疑面熟。譚於酒後感情真。墨香散處揮毫罷。歌頌誰矜著想新。

輓矢土錦山勝之

偃蹇以終世。伊人才不群。灌夫常使酒。馮衍最能文。楓落晚風急。天寒殘日曛。坵壇耆宿盡。餘子漫紛紛。

歲晚將再游讚州有作用前游詩韻

千里非生路。孤征寧說艱。寒潮通藻海。晚日闕松山。送  
臘景逾淨。出都心始閒。勝游記疇昔。衣上酒痕斑。

莊益堂 宅守歲疊韻

悔被聰明誤。到今吾道艱。行藏嗟白首。心跡繫青山。賣  
字頻爲客。尋詩且愛閒。忽忽歲華盡。鏡裏鬢毛斑。  
慈母老而健。久經薪水艱。歲殘勞夢寐。路遠隔河山。虛  
室琴尊冷。諸孫笑語閒。明朝獻壽處。誰著彩衣斑。

秋碧吟廬詩鈔卷八

秋碧吟廬詩鈔卷九

東京 久保得二 天隨

銅雀臺瓦硯歌 辛酉

硯係山崎宗鑑遺愛。蓋將軍義尙所授。宗鑑之流寓  
海南。猶攜之。歿後傳于興昌寺。以迄今云。

銅雀瓦硯絕世奇。縱八寸許廣稱之。蒼潤何石可相比。  
古彩膩光自陸離。鐫鐫迴與凡工別。元符題款字成列。  
算到廢興感莫窮。瓦不能言誰細說。阿瞞當日勢絕倫。  
橫行四海捲戰塵。乃築金屋貯珠翠。百花輦路長占春。  
春風欄角傳歌吹。秋燈又照舞容媚。安得此中鎖二喬。

英雄好色元無僞。漳水東流去不回。名香綺履化寒灰。  
野火吹入飛雲殿。觚稜日落望陵臺。七十疑塚遍山谷。  
森森松栢傷心目。縱有牀前總帳垂。嬌腔咽斷苦于哭。  
一自黑夜葬羯兒。城北石虎東南移。千金隄下龍舟過。  
旋見冰井據故基。浩劫重逢破國後。王氣消沈閱年久。  
漢將軍與趙天王。草埋園寢骨共朽。中原兵禍慘可憐。  
鬼神呵護汝獨全。緇流來往元明際。偶然攜上東歸船。  
嗣君陣中讀左傳。料知几案荷深眷。終隨高士到南州。  
託跡蕭寺罕人見。崔家博洽細商量。琴紋錫花尙尋常。  
規制固屬北齊上。何怪一倍歷滄桑。俯仰悠悠二千載。

田中

滿匣寶氣靈精在。七子文章早散亡。輸汝形貌長不改。

題看山不下樓。併贈益堂國手。

勁賞

染川似拖帶。琴嶺如豎屏。澄波映檐牙。溼嵐罩牕櫺。於  
時推月夜。清光遍沙汀。鶴鳴山欲曙。叢祠燈尙青。於節  
愛初秋。涼吹羽扇停。水聲和松籟。韶濩宛可聽。夫君最  
嗜酒。日倒雙玉瓶。看山不下樓。俯流弔獨醒。子由餘事  
少。閒誦內景經。夢得後身在。解撰陋室銘。養真始攬秀。  
嘯傲詩有靈。醫人非爲利。里閭德惟馨。

原雁泉來過。喜賦五疊韻。

重到煙霞國。暫忘塵網艱。相逢非白眼。一笑指青山。聯

移



履跡仍舊。停杯談自閒。詩成揮筆疾。滿紙墨痕斑。

川江卽尾藤二洲故里。

逸才生微賤。譬之玉在璞。師友互戒勵。知行共磨琢。一得洛閩書。專心唱正學。泮宮教諸生。霸府恩優渥。文宗韓與柳。言事必精確。夙慨名分亂。稱謂勞論駁。詩擬陶與白。興趣何悠邈。獨憩松菊叢。抒懷歸淳樸。至其氣象高。如山有五嶽。加之文彩美。如鳥有鸞鷟。誰來式故閭。鉅碑新礪斲。山水自清遠。風俗亦純慤。釣游跡可尋。奇巖擁海角。煙波望不盡。松聲疑廣樂。翻想人心危。誘導無先覺。安得招英魂。乃濟世溷濁。

賣劍詩龕初晤藤波千谿鑿賦似

相逢白社三。古佛亦同龕。燈澹梅香溢。天寒雪意酣。當筵拚劇飲。一夕縱清談。吟罷還分手。離愁獨不堪。

寄宮崎來城繁次其近製詩韻

相思空隔海天霞。舊夢零星感劫沙。莫道衰殘剩霜鬢。絕憐孤潔比梅花。江山嘯傲偏成癖。詩酒風流自一家。桂玉長安居不易。輸君故國種桑麻。丈夫未合老煙霞。年少曾輕博浪沙。欲散愁懷聊縱酒。幾揩淚眼且看花。干戈疇昔開邊徼。朋黨從來誤國家。狂杜罪言今可續。紛紛世事亂於麻。

擗管誰如蔡少霞。慨時吾似賈長沙。青春一夢趁流水。  
白髮滿頭羞晚花。耕盡硯田猶有債。閱來世路久無家。  
彈冠始列朝班末。金燭何年夜草麻。  
昨夢遙尋洞口霞。有時便擬鍊丹沙。一雙青雀忽傳信。  
萬樹碧桃初發花。不管光陰同過客。欲將海嶽作吾家。  
蓬萊水淺還回首。愁殺仙姑姓是麻。

益子加藤氏山園看梅

妝點谿山入畫圖。梅花一簇白模糊。芒屨度險頻飛步。  
恰有黃鸝迎我呼。

山前山後白作堆。南枝北枝花盡開。但因向背異疏密。

步遶林亭久不回

古幹槎枒瘦倍奇。值春底事著花遲。絕無媚態依時樣。  
略似先生悟後詩。

幽處初知氣味真。斷橋流水數株新。手摩枴腹苦吟久。  
只愧品題輸古人。

吹面風來春不寒。依微日氣罩林巒。樹頭樹底花齊放。  
徙倚移時子細看。

孤亭敲句且停筇。鯁盡谿邊花氣濃。奔走風塵獨搔首。  
幸然此地寄游蹤。

詩成得得欲抽毫。一霎花香吹入袍。好向山家偶相見。

居然標格傲人高。

日暮天寒玉有香。只容雪月鬪輝光。此花寧可朱門種。  
獨立竹籬茅舍傍。

片片趁風花點衣。支筇吟賞未言歸。黃昏月上春寒緊。  
襯地幽香溼不飛。

不盡風香細細傳。空山月色白於煙。今宵擬結趙郎夢。  
扶醉萬梅花底眠。

好文亭

郭西開園墅。厥土太高燥。有亭勢翼然。賢侯所營造。庭  
上絕纖塵。階下長瑤草。老梅一千株。放香風日燠。湖水

涵春城。原隰山四抱。展眺與目謀。百慮須一掃。想當游  
豫日。此中會父老。鐘鼓調八音。賜酺慶壽考。臺池非虛  
設。明哲知向道。遺蹟儼然存。勝概堪探討。庶民猶子來。  
偏惜夕曛早。舊名稱其實。真成偕樂好。

彰考館

義公志修史。羅致關西儒。討論始定藁。尤貴用意殊。褒  
貶洵不苟。立言與道俱。皇統分正閏。亂賊盡筆誅。繼述  
每有人。何關歲月徂。書成傳天下。儼爲萬世謨。尊王與  
賤霸。可以起懦夫。旋值風雲會。中興展雄圖。故館跡猶  
在。彷彿看規模。琳瑯堆一庫。芸香滿座隅。大業垂千古。

果然德不孤。正氣憑公活。寧比班馬徒。

寄題北華亭爲高階藤陽秀 考

秋田是佳縣。仙北草萊闢。地味素膏腴。縱橫通阡陌。中著北華亭。環園皆松柏。高樓眺矚宜。披襟意自適。烏海山千仞。天末遙嵐碧。雄物川百里。林杪片帆白。君慕古之人。游學記疇昔。歸隱魂夢安。迴與塵俗隔。雨讀而晴耕。優游度晨夕。乘閒抒雅懷。耽吟性元僻。毀譽兩相忘。心不爲形役。此間堪了生。何羨餐霞客。

寄徐仲可在滬上

誦君詩句想清標。邂逅無因恨更饒。料識湖山環故國。

曾聞袍笏列前朝。長天霜冷雁聲警。絕海濤高鯨氣驕。夢向錢塘江上去。聯鑣得意賦觀潮。

嗟吾都北臥蓬蒿。離索何由破鬱陶。垂老讀書猶有課。苦心校字不辭勞。峨山洋水志原遠。白雪陽春歌自高。鄴架賴君添幾卷。芸香深處夜燒膏。

神交直抵昔賢心。忽接瓊瑤喜不禁。竹帛功名緣亦薄。江湖歲月感偏深。聊期千古傳佳句。寧料同時值賞音。欲往從之天水隔。蜃煙滿目變晴陰。

輓高野竹隱

去秋洛下值君時。把臂縱談如舊知。忽被西風催遠別。

秘碧吟廬詩鈔 卷九  
九  
偏教明月照相思。騷人自古嗟憔悴。雅道于今易變衰。  
計至燈前雙淚落。峭寒四壁夜淒其。

江湖萍跡亦前因。君是詞壇第一人。王粲平生嘆非土。  
虞翻何處欲安身。主盟北郭交游盛。高臥東山歲月新。  
目斷玉樓雲漠漠。落花啼鳥已傷神。

性僻孤高與俗疏。仍將翰墨擅聲譽。金荃體格才無比。  
玉局文章力有餘。煙水鎮西千里權。水霜窮北一牀書。  
何心遺藁空藏櫃。未必人間知己虛。

入芳山口占。似同游佐藤六石。三谷耕雲。仲

芳山一路我能諳。時節又過三月三。春入櫻花何處好。

藏王堂下古陵南。

續芳山懷古

如意輪堂白堊明。滿山花氣午陰生。蕭條異代傷王愷。  
三向延元陵下行。

青山暝入白雲層。松栢成陰擁古陵。多事西巡又南狩。  
徵歌選舞誤中興。

衣冠蕭寺幾年留。對泣新亭一樣愁。西鳥東魚皆應識。  
君王底事寵獼猴。

煙塵滿目恨難消。板蕩維持歲月遙。石角如矛皆北向。  
居然風水可南朝。

御牀按劍死猶瞋。黑夜空山會鬼神。萬古威靈堪想像。  
當初恨不戮奸臣。  
憶昔殘秋慟鼎湖。淒涼玉匣與珠襦。播遷偏作宸衷苦。  
陵樹尙栖頭白烏。  
畿甸賊氛天日昏。無端風鶴易銷魂。心聲幾卷傳新葉。  
仍見朝紳氣概存。  
河山空繞舊行宮。當日回天策亦窮。留得廷臣心血在。  
年年春到野櫻紅。  
玉殿虛無奈恨何。紛紛四海弄干戈。千秋一部櫻雲記。  
彈出丈夫雙淚多。

依稀金碧寶樓臺。想到三朝末運哀。正氣乾坤長不盡。  
劫餘日月且遲回。

伊賀道中

斜陽黃襯菜花稠。晚靄紫拖山色幽。憶昨梅谿探勝去。  
春寒二月著重裘。

柳城訪永坂石埭席上賦呈

欲借陳家榻。金城晚下車。但因花竹密。便覺市朝賒。夢  
寐看丰彩。參商感歲華。丈人卜清夜。先薦酒前茶。

次大江因是病中書懷韻乃寄

彼岸亦非遠。大夢俄然醒。生死同一視。挽歌辭更靈。

衣食於奔走。幾多行路人。超然乘化去。何問藥君臣。  
豎儒偏厚顏。依樣說忠孝。萬象一如如。空門有餘教。  
醉生而夢死。世降到如今。億劫不泯者。胸中方寸心。  
平生不顧身。濁世任匡救。其逝亦有爲。何必嗟薄祐。  
內養經年久。恍看眉宇光。如何花後病。長日掩禪房。

奉送皇太子外游

鵬程萬里試觀風。不負重明聲譽隆。劫後乾坤初整頓。  
五雲爛照水晶宮。

賈姬曲

君才固非李王倫。又救盧栴俠名新。諸王虛左競延致。

朱顏白首眇山人。鄴都三月花如錦。爲君琵琶助劇飲。  
玉山旣倒要妾扶。祗可當薦肱爲枕。明朝君進新竹枝。  
輕攏慢撚亦相宜。曲終鈿車載妾去。絕似松陵回首時。  
多君紫裘負意氣。俗子相排真無謂。枚乘慣作大國賓。  
游遍燕趙與韓魏。野史斯生等浮漚。醉魂騎鯨何處留。  
今日蕭寺寄旅櫬。落紅滿地水空流。夜夜四絃悽欲絕。  
慟向棺前淚和血。依稀鴛衾夢有痕。豈圖一朝成永訣。  
從是人間形影單。忍見帳額繡孤鸞。千金裝充歸葬費。  
手碎檀槽不復彈。春不見白雪樓。廢草埋井。濟南城外  
夕陽冷。蔡姬憔悴更可憐。典盡羅裙貧賣餅。

送田邊碧堂華西游

一自箕邦歸版籍。雨露頻年布帝澤。故人此去向遼東。  
行尋王師轉戰跡。松杏山河接瀋陽。昭陵坏土草木黃。  
誰信清祖龍興日。一擊容易舉朔方。瑯琊碑古知者少。  
曲阜地荒泗水繞。振衣獨立岱頂高。野開青徐天杳杳。  
太液波冷渚蓮愁。瀛臺燐聚鬼哭幽。西風忽從紫塞起。  
颯作十三陵樹秋。颺輪過處勞指顧。夏口猶存形勝固。  
隔岸人煙是武昌。黃鶴樓廢已非故。扁舟載酒浮洞庭。  
舷首直觸君山青。露洗長空月華白。夜深聽瑟弔湘靈。  
旋向琵琶亭下宿。晨入廬山看飛瀑。彭澤墟在湖口東。

江到馬當水迴洑。大塊文章盪心胸。就中禹域神秀鍾。  
蘇杭勝概君所熟。杖屐重留鴻爪蹤。千里離家仍適意。  
祇道煙霞輒爲累。從來詩畫負聲譽。料識名流競招致。  
獨憾行程自有涯。巴雨蜀雲牽夢賒。巫峽西上灘響壯。  
劍閣北出棧道斜。劫後乾坤頻俯仰。解否一理通萬象。  
地氣遷移數可推。百代興亡如指掌。底事闖牆南北分。  
飛警頻至不堪聞。丈夫要懷經世志。區區小技何足云。  
先大人二十年忌辰賦此

一自廢蓼莪。忽過二十春。風樹復蕭瑟。追往空愴神。先  
子懷瑋質。夙矜業履醇。道方而事實。氣象自清純。如何



和碧山廬詩錄 卷九  
瑚璉器。不爲廊廟珍。廣文官獨冷。粥齋生計貧。去指南  
荒遠。老境猶悲辛。偶被瘴癘侵。臥病未盈旬。傷哉易簣  
際。側無葭莩親。兒罪終難贖。凶夢醒亦真。全家擁遺骨。  
慟哭向九旻。溫容眼前幻。誰尋來世因。伊余承餘慶。餽  
口度昏晨。四弟皆樹立。有孫十一人。今日齊會此。墓前  
薦藻蘋。楚些歌正罷。惻然思慕頻。竊望憑冥護。三恕共  
端身。高門擬于公。家聲還一振。反哺烏啞啞。聞之淚霑  
巾。迴看斜陽裏。松楸秋氣新。

與好文會諸子飲鮫酒樓

放眼江湖遠。銜杯興正長。天低煙樹黑。雨過晚潮黃。爛

醉須相恕。豪吟原不妨。樓頭挑燭處。風盪畫簾涼。

將游山陰鎮西臨發題壁

驛路迢迢筆硯隨。文章例自客中奇。登高能賦興須王。  
載酒而行狂亦宜。夙詫好游軼靈運。寧求采藥值安期。  
錦囊添重歸來好。應是紫薇花發時。

孤征唯賴一枝藜。行盡山陽到鎮西。側帽偏衫存故態。  
凌滄搖嶽足新題。秋從林樹疏邊早。天向關河杳處低。  
最是出門胸字潤。去來跡與白雲齊。

勝地何妨作再游。海山恰好入新秋。霸家臺下魚龍變。  
耶馬谿頭洞壑幽。至竟光陰易催老。除非詩酒不禁愁。

此行併趁故人約。笑指暮雲天盡頭。

鞞港

天空海潤滌塵腸。雨後放晴洲渚長。寺踞崖端孤磬斷。  
帆過松頂一風涼。江山昨歷<sup>五</sup><sub>五</sub>日<sup>五</sup><sub>五</sub>煙水今成鷗鷺鄉。  
隨處高樓皆可倚。探奇連日爲詩忙。

偶訪遺蹤了勝緣。山輝水映共依然。神功駐蹕遠征日。  
韓客倚欄高詠年。萬頃波平翠螺蘸。一帆風穩白鷗眠。  
賞心最是斜<sup>作</sup>候。立盡島雲祠樹前。

沙鷗驚起晚潮催。舒嘯拍欄呼快哉。大海煙濤多島嶼。  
一天風月此樓臺。誰知勝境憑詩重。翻覺衰顏對酒開。

欲向水心放橈出。蘋花香漾早涼來。

對山館夜坐

依稀鳥影檻前欹。薄夜涼從蘋末吹。聽到舫聲疑雁語。  
一灣潮漲月來遲。

對仙醉樓

豫山青如黛。燧洋鏡樣平。松翠吹落水。咫尺島雲晴。眼  
界殊開豁。意欲凌滄瀛。署曰對仙醉。賴翁所命名。奇文  
亞歐蘇。聊酬主人情。<sup>勝</sup>游知幾回。墨痕壁上明。旭莊與  
鐵兜。長句鬪輸贏。想當擘箋際。逸氣毫端生。怡齋逝已  
久。積善家亦傾。樓今歸阪氏。遺構存軒楹。予爲書匾額。

勝緣洵不輕。後人此憶予。如予憶子成。

望仙樓

壁揭聿菴書。望仙名亦好。危樓高百尺。何年此營造。一灣潮光潤。欹岸接側島。嫩嵐簇作團。亂松森翠葆。天女與仙醉。其間通水道。南天鯨氣深。豫海波浩浩。長風颯然至。欄角夕涼早。時有巨魚跳。淪漪漾寒藻。蹇予懷百憂。久矣塵途老。欲攬江山勝。物外除熱惱。臨眺已移時。酣醉瓶亦倒。興王呼筆硯。題詩勿草草。

仙醉島

仙醉島如浮。好景世無二。前賢說已詳。佳名妙取譬。想

當晨霞升。紅日射積翠。山亦試卯飲。頽然欹羽帔。次當夕陽春。紫靄催暝至。山亦拚晚酌。酡顏殊秀媚。更想煙雨候。海天潮氣漬。山亦困宿醒。紗帳偏貪睡。今我放輕舟。近矚探靈異。其形似蓬萊。樹石森排比。牛首接祇園。彌山居乾位。觀月虛空藏。巖嵒正序次。亂松吹溼嵐。秀色凝且萃。天風時鼓琴。仙鶴來戢翅。斜岸斷復續。七浦曲而邃。行帆巖側過。浴鷗波間戲。步自苔磯登。亭榭新增置。空水晴更鮮。雄覽頗適意。漾漾秋潮平。周航信容易。游賞興不窮。浩然祛塵累。歸來倚危樓。午鐘出蕭寺。玉奴捧酒觥。取次吟可試。抽毫詩亦靈。要發煙霞祕。仙

秘碧吟廬詩錄 卷九  
島呼將磨一揖吾亦醉。

阿伏菟岬登觀音閣。

海畔紺宇靜。日射祇樹林。爐氣結作雲。梵唄和潮音。虛廊盤空上。飛閣踞峻岑。奇工疑鬼設。勝名傳古今。下有蛟龍窟。頰首試一臨。凜然膽驚悸。絕壁高千尋。當面豫山杳。午天蜃煙深。近控梔子峽。白鷗故浮沈。古佛祈有驗。惡浪莫相侵。海色平如熨。千帆過島陰。清秋饒涼意。長風吹我襟。羣松亦鼓鬣。韻于成連琴。拍欄神飛越。乃試物外吟。迴睇攬景勝。洗盡五濁心。

桑田氏曩舉長子。懇乞予詩。乃集葩經句。成一章。

十六句書以贈焉。

維熊維罴。長發其祥。居然生子。其泣嗶嗶。制彼裳衣。左右奉璋。實維我儀。婉如清揚。永錫祚胤。先祖是皇。無災無害。自天降康。淑慎其身。庶幾有臧。惴惴小心。不可弭忘。

保命酒歌爲岡本氏。

鴻荒之世既有酒。未詳創始屬誰某。八頭蛇醉八口槽。砉然割之不輟手。八雲徐繞八重垣。茲卜新居獲新婦。一劍勳高便合休。當日素尊解飲否。次有神人少彥名。功與神農正抗衡。曾嘗百草調劑好。又製藥酒勸養生。

秘苑吟廬詩錄 卷九 一四  
莫怪邃古人皆壽。爲是和樂陶性情。典儀載在延喜式。  
中朝禋祀禮非輕。又傳神功征韓日。且向薇南駐仙蹕。  
來熊國造獻芳醇。樽罍奠楹神降吉。明春奏凱班六師。  
沙頭犒飲黃流溢。傳宣錫號曰三降。大酒主姓亦無匹。  
吉備良醞古之遺。萬葉集中存妙詞。爾來釀法逐年進。  
子孫相傳守業宜。聲價乃與蘭席比。名流題詠鬪瑰奇。  
七卿西竄停撓夕。臨風浩嘯笑舉卮。地黃爲主可醫痼。  
藥種十六香味具。美而不甜冽不醜。前人斷案得真趣。  
磁瓶奇古其色朱。遠輸四方封褰固。開緘苾芬衝鼻來。  
螺盃瀲灩春波注。壓倒蘭陵琥珀光。直抵南海龍腦漿。

下喉有聲洵快絕。靈液津津潤肺腸。欲問蓬萊山何處。  
恍然遺世神飄揚。寧知舊國臨海表。仙醉奇勝足仙鄉。  
保命養氣功驗大。畢竟百利無一害。翻憐夏禹切擔憂。  
要向九原成薄酌。流鬼高麗與荷蘭。信使齋歸恣賞會。  
頃者梯航萬里通。佳名早已遍內外。今茲西游滯巴津。  
連日雅讌觴詠頻。多謝主人贈此物。一段深情勝汪倫。  
爲君長歌頌酒德。吾詩應同麴米醇。驛路槐花東歸後。  
千里重寄碧香新。

神邊驛卽營茶山故里。

招魂悵望白雲鄉。生不同時恨正長。一代耆英傳德業。

四時風月入詞章。野田秋到稻花亂。驛樹雨過蟬語涼。  
欲問故居何處是。茶磨山下又斜陽。

尾道

玉浦饒佳景。題詩續昨游。涼風送潮至。秋色挾山浮。市  
富存名利。灣深容巨舟。笙歌殊可聽。來倚酒家樓。

千光寺絕頂

清晨試臨眺。古寺倚崢嶸。鳥趁孤帆去。波涵萬瓦明。山  
山含石氣。樹樹盡秋聲。絕頂振衣立。紅輪海角生。

馬關

疏鐘落日彌陀寺。喬木流雲壽永陵。一自冕旒葬魚腹。

海門駭浪雪崩騰。

至久留米。宿宮崎來城家。酒間次見似詩韻

形容共非舊。兩鬢點新霜。一自關河阻。徒然歲月長。涼  
翻苧衣白。秋到井梧黃。勝會先呼酒。高歌入醉鄉。

絕無利名累。松下掩柴扃。題柱已違志。草玄仍有亭。餘  
生偏偃蹇。故友半凋零。只是風流遠。談詩眼共青。

十五年間事。尊前說向君。人情翻覆手。游跡去來雲。長  
孺嗟薪積。敬通甘蕙焚。文章重古調。湖海枉離群。

來城導予。游武藏溫泉。藤瀨冠村。綯邀飲。席上來  
城先有詩。乃次其韻。併似冠村。

爾我襟懷醉裏知。當筵一笑了幽期。月因移影夜初靜。  
秋欲成聲涼乍吹。風格既同江左秀。文章須趁鄴中奇。  
三更聽到新蟲語。個個疏花露滿籬。

憶昨行似次

憶昨共爲鎮西客。霸家臺下留萍跡。破帽弊衫元慣貧。  
與君吟行意殊適。十里松溼帶濤痕。宸筆長輝伏敵門。  
一自神風覆胡艦。夜夜蛟宮泣幽魂。神后偉業邈千載。  
巨檣化石半沈海。迂路去賽香椎祠。依然丹碧存華彩。  
他日南向萱關過。水城作墟長秋禾。觀音寺古疏鐘歇。  
都府樓荒敗礎多。雕甍畫垣巧位置。神苑鶴鳴散嵐翠。

緬想白屋拜御衣。西風灑盡傷心淚。寶滿山高青挿天。  
石徑如綫斷復連。手挽鐵鎖凌絕頂。長嘯曠望夕陽前。  
當時大陸戰雲壯。入秋渤海怒潮漲。海陸連勝我武揚。  
諸將名揭麟閣上。君云夙志在封侯。丈夫報國死當休。  
一文一武班家似。肯落人間第二流。廿年飄瞥烏兔走。  
君今榮達佩朱綬。獨憾先人不及看。七尺堂堂好身手。  
疇昔來城駐吾車。始驚游蹤在天涯。多君休沐遠相訪。  
涼燈影裏酒可賒。北筑景勝仍如昨。水自汪洋山窄嶮。  
爲君一誦舊題篇。矧有往事供笑謔。老思同氣情難堪。  
欲盡山中十日酣。明發攜手行亦好。球摩峽東火州南。

車中望雲仙嶽短歌

車過長洲驛。遙望雲仙嶽。拔海而起撐空高。高五千仞  
何超卓。鳥耶陸耶看且疑。景皇西征年代邈。滿山草木  
鬱青青。百里合沓毓秀靈。黛光鬢影添姿態。雲袂霞裾  
更伶俜。絕谷水堆不知暑。掬到神瀆可延齡。登臨曾當  
清秋曙。手排閭闔迎日馭。濟勝固非過眼緣。其奈歲月  
堂堂去。指點顧向傍人誇。二十年前振衣處。

球摩峽

兩山幾低昂。中間灘流駛。峽險過夔巫。連亙一百里。奇  
巖無依傍。兀自谿頭峙。老松皆倒生。枝幹虬龍似。衆籟

相呼應。颯乎天風起。其聲聽方遠。白雲飄如紙。湍鳴水  
怒奔。餘流洗山趾。疑轟壑底雷。喧豕駭人耳。當其注深  
潭。渦旋猶未已。孱顏惜難鑿。水性妒乃爾。昔我僦扁舟。  
一過疾于矢。唯見岸樹移。羣巘隨披靡。飛沫雜蛟涎。幽  
宮真尺咫。宛從天上落。其快何所比。今有鐵軌通。險艱沮  
盡疏理。巨洞穿巖腹。一路長透。灑攬勝興不窮。穩坐車  
箱裏。仰揖萬仞山。俯掬千谿水。野色忽豁開。炊煙簇成  
市。迴看晚靄深。峽口斜照紫。

迤

不相諫

人吉翠嵐樓題壁

一水欄下奔。羣山檐角立。日色青逾澹。叢樹圍原隰。浴



後晞髮處。秋氣凜相襲。山輝水更激。煙嵐可噓吸。有時  
遠風至。颯然松籟急。殘蟬咽不聲。須臾斜照入。好景與  
目謀。莫教俗屨及。此心返自然。此身無羈繫。

日南久浴舍

高下亭臺簇作鄉。海山景勝不尋常。半空淨插雲仙嶽。  
十里水晴開天草。洋煙抹螺痕。歸舫遠。風翻魚氣。鈞磯涼。  
靈泉已是清人骨。坐臥思詩忘日長。

高山仲繩墓

吾心忻慕久。稽首此焚香。頗類唐衢哭。仍勝阮籍狂。終  
生困逆旅。夙志在勤王。片碣碧苔溼。明時名倍揚。

大伴部博麻碑

我軍大敗白村江。從是羅濟非舊邦。血戰力盡作囚虜。  
頻遭薄祐亦無雙。爲友賣身何所悔。背生蟲蛆猶健在。  
枕上歸夢偏易醒。故國千里隔滄海。頭白面皺真可憐。  
流落唐土廿餘年。志行不類軍丁賤。唯有蘇武纔比肩。  
生死難易夔然別。丹心一片存餘烈。遲暮贖回就首丘。  
天朝賞賜旌大節。事蹟湮晦世代移。水史列傳亦遺之。  
獨喜此地近桑梓。鉅碑長傍篠山祠。

中津自性寺觀池大雅書畫

大雅古君子。清高類嵇阮。疏放雖爲性。至情極誠悃。早

秘碧吟廬詩鈔 卷九  
歲趁南宗。南海源流遠。譬如摩詰後。北宋出北苑。書亦  
撫獻之。一意務窮本。應笑祝董徒。滔滔不知返。何妨落  
筆跡。醜陋而奇蹇。細視氣品高。苦心抵深穩。自性古精  
藍。藏弄無虧損。滿壁賸雲煙。相戒莫越閫。我來此遲留。  
心賞意繾綣。髣髴見其人。敢憾斯生晚。

耶馬谿十律

百八峰巒底。十三村落開。涼風吹不定。遠樹簇成堆。谿  
蹙泉聲大。巖欹鳥道回。只須攬幽勝。絕境試吾才。  
高秋詩興王。得意引筇過。隔壑樹聲遠。環村山色多。曾  
游猶夢寐。生路莫蹉跎。滿目煙霞麗。探奇行且歌。

峽底斜通路。高低幾十程。奇雲助峰勢。涼吹亂泉聲。欲  
聞神仙祕。偏矜杖屨輕。林霏散無跡。風日媚新晴。  
山山看不飽。忽被白雲遮。洞壑欲無路。耕樵纔有家。石  
泉經雨活。崖樹受風斜。涼氣翻衣袂。翛然發興賒。  
日午秋霞澹。迎人鳥語喧。危峰截雲立。亂水拍岸奔。林  
下全無暑。谿頭又一村。芒鞋不辭險。步步近仙源。  
石破天驚後。五丁初畢工。松杉晴尚溼。澗壑午還風。長  
路行無倦。羣山看不同。巖頭嘯而立。顥氣滿秋空。  
泉自樹梢瀉。千峰蒼翠圍。幽花向日媚。去鳥背人飛。路  
仄雲生屐。天清秋透衣。倚筇吟正罷。谷口一樵歸。

林巒妙於畫。拾句且徜徉。萬壑已秋意。一峰猶夕陽。入  
雲歸鳥沒。抱樹晚蟬涼。幽境探難盡。天昏去路長。  
詩成歸亦好。晚景乍淒迷。衝石谿逾曲。離山路漸低。亂  
煙孤驛外。斜照遠林西。回顧乃停步。羈禽趁暝啼。  
峽口時回首。擎天石是屏。谷風疑虎嘯。潭水帶龍腥。漠  
漠棧雲白。濛濛崗樹青。言歸便投宿。薄暮叩柴扃。

前詩意有未盡。乃續成十絕句。

新晴一路客行閒。幽僻由來仙所寰。看到冷雲低樹外。  
分明紫翠繪秋山。

微吟閒步影伶仃。濟勝唯須險路經。危棧飛流三十里。

晴煙刷作萬山青。

一任涼風颭客衣。峽中樹色帶煙霏。深湫決作奔湍急。  
忽見谿魚挾雨飛。

雨過谿頭晴色分。蟬聲斷續隔林聞。青山朵朵爭先出。  
一颯天風拂亂雲。

夾路松篁鬱作林。林端日午嘒幽禽。遙天猶見雲搖曳。  
山與秋光有淺深。

棲真何處洞天幽。步到谿泉欲盡頭。古木蒼藤莽無路。  
暝嵐低地鎖清秋。

松風度水韻於簫。目斷峽天秋色饒。斜照亂山高下路。

一肩黃葉有歸樵。

咫尺千峰暮色生。風從木末捲秋聲。碧奔青倒攔不住。  
出峽人隨流水行。

疎鐘一杵出林時。貪景低徊移屐遲。水態山容多變化。  
詩懷偏與夕陽宜。

高低錯出幾千峰。雲木蒼蒼晚靄濃。仰見奇巖聳天半。  
斷猿聲在倒生松。

宿羅漢寺

傍崖樓脚高。招提境自靜。涼風入紗幮。夢醒宵正永。四  
更看月生。莎底蟲聲警。白雲衆壑平。莽莽夜山影。茲寄

塵外蹤。萬慮都驅屏。秋氣殊可人。露華溼衣冷。耿耿終  
不寐。倚欄撫清景。墟落燈火殘。曙色自遙嶺。

洞鳴峽

羣山頻奔倒。峽天忽開朗。怪石個個殊。畫手誰摹倣。或  
如蹲虎豹。或如鬪獅象。或競晉楚雄。或爭滕薛長。橋勢  
似拖虹。其下亂流響。一頓成瀑布。珠玉紛跳盪。鄰之洞  
壑闕。曠絕固無兩。仙客跡可尋。延佇神已往。煙斂朝暉  
麗。松吹入秋爽。祇有化工奇。眷我出塵想。

過青村竇道有感僧禪海之事

以一婦故戕其主。斧鉞之誅何足數。由來小忿易誤身。

前尤後悔心更苦。可憐薙髮歸佛門。雲情水思避塵煩。  
只期餘生償罪障。濟世功德種善根。鎖戶渡頭山峭絕。  
脚躡飛梯膽破裂。欲開竇道便行人。乃與愚公出一轍。  
巨鎚鑿石不停聲。山魃木魅半宵驚。誰是千里尋蹤至。  
祇恐一死志難成。生身菩薩慈悲相。其人起敬甘相讓。  
決然又入役夫羣。夙夜分勞氣力壯。三十星霜去忽忽。  
三百餘步路初通。今日老軀終無用。願斬吾頭祭乃翁。  
浮生恩怨仍孽業。多謝憑君悟妙法。握手而泣分袂還。  
畢竟縱仇亦非怯。奇聞千古猶覺新。但憾戲劇動亂真。  
智剛寺裏埋骨穩。僧名禪海北越人。

後誰

扇城吟社諸子。觴予于竹枝亭。席上分韻。

忽漫相逢亦夙緣。低吟淺酌美人前。同心有友皆詩客。  
傲世之情抵酒仙。明月來臨秋水渺。嫩涼吹放藕花妍。  
無端想到分襟苦。譜得新愁入夜絃。

夜半航豫豐間。舟中放歌。

菡萏灣頭月上遲。一汀燈火漾淪漪。薄夜餘熱未消盡。  
苦待涼風入衣吹。陰雲四合滄溟黑。宛然身落蛟龍國。  
一睡夢醒更已移。放歌獨立舵樓側。唯見金波漾漾流。  
鮫宮蜃闕齊盪秋。銀漢欲斜冰輪白。露氣和煙水面浮。  
觀海初可語大理。有時怒濤排空起。快意尤與變化宜。

嗚呼丈夫不徒死。

鄉照寺題壁同原雁泉

青峰一千仞。古寺倚巖阿。歷劫繁華盡。憑高感慨多。殘霞仍有色。遠水自無波。斜照疏鐘裏。西風拂薜蘿。

同雁泉至赤穗館于司馬氏。福田眉仙來過。喜賦。趁約君方至。清歡愜素心。題詩不停筆。對酒又披襟。半夜燭華亂。一堂秋氣深。蓼城饒景勝。明日共相尋。

大石祠

廿載重過義士鄉。遺墟今日儼祠堂。故國神游合無憾。一邱花木帶輝光。

山鹿素行謫居址

曾校先生書。此心增傾慕。洙泗真傳絕。俊傑乃騰鶩。周孔直可師。履行是本務。邦俗本尚武。韜鈴亦要具。懲羹者吹壘。當路漫相惡。檻車送播南。故君善調護。慎獨無惰容。教人有餘裕。後年義士出。遺澤作其素。十年值赦歸。門下猶景附。聲望老更高。臥病嘆遲暮。今我尋舊蹤。拖筇城西路。一邱沒荒蕪。灌莽礙行步。墟落夕陽低。亂鴉集郊樹。愴然傷懷抱。回踵屢瞻顧。世情水東流。百弊堪悚懼。何由振名教。爲道起癡痼。

赤穗窰鹽竈香爐歌謝前賀蓼城。卯太郎惠貺。

赤穗之海徹底清。煮而爲鹽白晶瑩。士風純同鹽味潔。  
共擅今古第一名。四十七人齊赴義。臥薪嘗膽心無貳。  
雪夜直斫仇家門。一擊能成故君志。憶昔僦舟自薇南。  
停橈一灣綠波涵。沙頭火殘人初去。蘆花擁岸吹曉嵐。  
今日城中又弔古。西風滿目賸瓜圃。寒煙澹日石氏墟。  
老櫻葉盡黃如雨。山人埴陶聲譽殊。創意新奇絕代無。  
乃取大夫舊庭土。巧模嵯窳作香爐。慇懃相贈不毫惜。  
感君意厚踊三百。齋歸擬置吟牀頭。緬懷兩度曾游跡。  
聞道攝播閱兵年。內官傳獻御座前。果否楓宸日長候。  
珠簾繞閣颺篆煙。獨奈末俗人心壞。誰敍彝倫垂勸戒。

一炷好招義士魂。餘香薰破大千界。

阪越港

新秋雨初霽。漾漾午潮平。餘靄抹空澹。一帆離岸行。海  
山堪縱目。鷗鷺豈無情。顧愧羊裘客。風塵誤此生。

兒島高德墓

勤王夙志終不移。身居偏裨履艱危。到底驥足無由展。  
絕似李廣命數奇。行宮雨暗落花夕。白樹題得十字詩。  
他日君王能記否。從前越國有范蠡。峰堂一敗因懦豎。  
獨備夜襲拔營遲。篝火已殘鼓鞞歇。歸來從容收錦旗。  
先聲之功等楠子。只願中興壯帝基。瓜分天下賞太濫。

翻覆綸旨亦徒爲。重見煙塵捲地起。無端世局如奕棋。  
南風不競恨何極。一身轉戰頻奔馳。就中熊山兵殊寡。  
絕而復蘇裹創騎。且喜要衝落我手。七路賊軍盡紛披。  
入京潛圖殲渠帥。其奈蹤跡被人知。銜命東邊募義故。  
鑾輿南遷又愆期。暮年衲衣避指目。千里間關飛錫姿。  
例是神龍藏其尾。誰料終焉屬荒陲。播南今過阪越浦。  
崗頭儼存三尺碑。鐘沈魚默金碧古。西風颯入祇樹吹。  
伏匿擇地良有以。矧又養痾久住茲。安得飛舸時一出。  
山陽南海歸指麾。想見破牀易簣際。薄暮空山鴉語悲。  
整頓乾坤終無日。撫枕痛憤涕交頤。由來僻論動駭世。

高齋學士漫好奇。直將烏有子虛比。却忘偉績關綱維。  
蓋臣典型公獨在。傾廈誓欲一木支。畢竟成敗非所管。  
氣節風流千古垂。

送李幼安歸長陽次其留別詩韻

李侯江海人。耿介抱亮節。十歲客扶桑。豪氣未衰歇。秋  
高天宇澂。園林啼鶡馱。是日來相辭。舊歡忽飄瞥。顧予  
悲老大。齒牙輒杌隉。半生慣數奇。名場頻稱屈。憑君消  
不平。譬如湯沃雪。佳會莫愆期。當筵霏談屑。所志在濟  
世。此才堪心折。非爲尊鱸美。歸計亦卒卒。丈夫貴雄飛。  
誰是一棚鶻。九州猶亂麻。慷慨肝熱。驪歌調何苦。黯



秋碧吟廬詩金 卷九 二九  
然難爲別。從今隔萬里。或恐成永訣。鑒我方寸者。唯有  
天上月。

送懷獻侯 桂琛 歸鎮江次其留別詩韻。

拂衣浩歌歸興宜。百壺美酒聊餞之。布帆無恙入京口。  
回首蓬島游跡奇。一自燕山鼎折足。羽檄南北猶交馳。  
殘棋變局頻打劫。車書混同未易期。把琴彈到秋風引。  
古來傷心唯別離。北固樓前棲穩否。他日停雲多所思。

小松老雪 喜 八十壽言集宋人句。

八十康寧有幾人。樽前懷抱頗清真。舊聞草木皆仙藥。  
天地常藏不盡春。范純仁。陸游。蘇軾。鄭肅。

奉迎鶴駕自歐洲還

游遍伊白蘭法英。聞道玉帛新修盟。行三萬里經半歲。  
秋之九月歸東京。

林丘寺

皇家貴主愛安禪。遺跡香臺想昔年。既自林邱開大道。  
免將粉黛礙諸緣。秋臨絕頂鐘聲冷。地接離宮樹色妍。  
龍女聞經猶解脫。何疑悟後再生天。

詩仙堂

犯令而先登。健鬪頻獲首。去作大國賓。俸祿唯奉母。服  
闋乃隱居。夙志寧可負。誓不涉鳧川。高操固無偶。台麓

秘碧吟廬詩金 卷九  
幽境開。積翠映窓牖。嘯月好有樓。老梅傍關右。撫罷眉  
公琴。笑斟陶家酒。詩仙像揭壁。都爲隔世友。篇什存專  
集。才力尤渾厚。矍鑠享大年。聲名亦不朽。此來跡可弔。  
遺構女僧守。斜日照早楓。風葉繞廊走。清氣寥廓高。蒲  
牢時一吼。又指埋骨處。秋色滿林阜。

桂村途上

西山笏立翠岩崑。陌上紅塵限七條。錦石清流斜日麗。  
離宮樹色隔平橋。

阿彌陀峰弔豐臣秀吉墓

少時面似猴。出身自臧獲。幾歲馬上勞。功成任關白。拓

地已容易。分之不毫惜。仍解尊王義。御前誓侯伯。暮年  
賸壯志。乃講征韓策。鐵蹄所蹴踏。雞林土皆赤。雄才駕  
秦皇。却同興替跡。絕祀由弱子。何處認餘澤。佳城久荒  
廢。修築今勝昔。松栢颯生風。魂來日之夕。回頭坤輿上。  
時局頻變易。公若有替人。邦家免困厄。

菟道雜詩

喬木栖鴉落照昏。菟裘地古跡猶存。千秋讓德資風化。  
廟貌丹青俎豆尊。  
攀花聞鳥欲忘歸。絕代豪華事已非。賸見富家渡頭柳。  
一株憔悴故依依。

跌坐佛前唯嘯歌。老僧當日住巖阿。居然秋月曉雲趣。婦幼絹黃傳不多。

平泉花木易荒涼。幽境殊宜選佛場。齋後老禪誦經罷。曼陀雨下鳳凰堂。

無難無災到白頭。漫將歌詠詫風流。舉兵未必敵王愾。猶是九泉堪洗羞。

山川劫後夕陽傾。躍馬先登誰擅名。水自鹿跳澗邊下。浪花如雪捲灘聲。

萬福寺

西來瓶錫此淹留。滄海天遙幾轉頭。勝國衣冠多涕淚。

一時翰墨擅風流。栖鴉落木孤村晚。斜照殘楓古寺秋。欲問傳燈有人否。紺園閒殺好林邱。

法華寺

絕代佳人光明子。終生功德願何已。除垢且忘坤位尊。金仙爲厲來相試。臺殿半殘往事非。只容末山悟禪機。長眉豐頰剃痕碧。庭楓紅映壞色衣。

法隆寺

斑鳩邸作梵王宮。緬想儲君德業隆。既見典章易殊俗。何疑朝野仰英風。千秋不改樓臺儼。四壁仍存圖繪工。鐘鼓聲殘鴉語鬧。斜陽林末有丹楓。

蘇行卷九

御室途上

清晨出郭獨徜徉。一路西風野菊香。欲問高人栖隱跡。  
松嵐秀處是雙岡。

大覺寺

嵯峨山院古。地僻絕塵囂。木落羣峰出。天寒一磬飄。樓  
臺思北闕。劍璽記南朝。遺事口碑在。低徊魂易銷。

月夜游嵐峽

樹影如山嵐氣饒。峽天秋老鵲聲遙。松風瀉作潺湲水。  
半夜人過渡月橋。

修善寺客舍

肖廬山下虎谿橋。隔岸亭臺燈火搖。驀地西風疑帶雨。  
一天落木夜蕭蕭。

源賴家墓

外家翁媪如魑魅。奪國衽席猶猜忌。快心只欲除姦邪。  
始知宴安非君志。身作楚囚歲月移。忍見宗社纍卵危。  
浴室殞命同乃祖。空山苔埋三尺碑。石櫃藏經又何補。  
骨肉情真心轉苦。指月殿前墮淚人。猶勝天后姓是武。

次湯河遠洋晚翠居題壁韻。乃寄。

軒冕如塗泥。優游江湖遠。功成而身退。君子唯好遯。湘  
南卜築佳。環屋松偃蹇。海山氣自清。看書烏几穩。文義

秘碧吟廬詩鈔 卷九  
喜賞會。風格凌謝混。雲龍與我諧。何憾相見晚。  
飯後引藜行。茶前據梧睡。松聲韻于琴。嵐影欲無地。幽  
栖愜素心。茲極林泉致。雞雀世上喧。雲天鶴舉翅。唯許  
吟朋過。不期高車至。笑指玉芙蓉。兀出千梢翠。  
觀海興堪賦。敢輸木玄虛。長風過欄角。陰晦終廓如。胸  
中濶千尺。世事付一噓。仙島真咫尺。鷗背帆影舒。誰知  
廟廊上。曾負元凱譽。豁達無華飾。相士先以居。

晚翠居小集限韻。同草間天葩。豐島春齋。住作

都門拂衣去。獨倚讀書樓。黃菊過佳節。江湖感舊游。有  
詩初免俗。唯酒可忘憂。移步沙汀上。心閒狎海鷗。

海山晴可畫。蟹稻別成鄉。煙斂三湘遠。帆開一水長。酒  
盟嫌寂寞。詩思墮蒼茫。笑謝人間事。春花不再陽。  
經秋吟骨健。顥氣有餘清。潮湧沙鷗起。天空島樹明。何  
時跨大海。一舉掣長鯨。快意無拘束。翻憐世俗情。  
拾句前庭去。書堂正罷琴。沙痕溼黏屐。海氣颯吹襟。大  
嶽帶晴雪。亂松生夕陰。風光堪攬取。取次入高吟。

輓土居香國

浮生一夢抵黃梁。旅櫬歸來又北邙。曾擲衣冠餘氣概。  
爲憂家國有文章。支風借月吟相適。紅粉青山老更狂。  
幸是千篇詩壽梓。坵壇當日姓名揚。

輓中村櫻谿

忠誠

藹然古君子。昭代一醇儒。人與流年逝。天留片月孤。學風重濂洛。文思趁歐蘇。尊酒記疇昔。偏欽懷抱殊。

曉過龍王驛

凌晨人影寒伶仃。懸輪遭險行且停。初日依微積雪白。峽中山色無一青。

鵝湖客舍守歲

盡日樓居好。閒中忘歲移。雲山接故里。杯酒引新知。慣筆字初穩。敲壺歌亦奇。燈華寒四壁。客去就眠遲。

秋碧吟廬詩鈔卷九

健



